

CHL 9117.1148

41

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE

OCT 11 1932

~~40~~





唐人萬首絕句選序

哈佛大學漢和  
圖書館珍藏印

漁洋山人撰宋洪氏唐人萬首絕句既成或問曰  
先生撰唐人絕句意何居應之曰吾以它唐樂府  
也曰絕句也而謂之樂府何也曰樂府之名其來  
尚矣世謂始於漢武非也按史記高祖過沛詩三  
侯之章又令唐山夫人爲房中之歌西京雜記又  
謂戚夫人善歌出塞入塞望歸之曲則樂府實始  
漢初武帝時增天馬赤蛟白麟等十九章以李延  
年爲協律都尉集五經之士相與次第其聲通知  
其意而樂府始盛其云武帝者託始焉爾東漢之



末曹氏父子兄弟雅擅文藻所爲樂府悲壯奧澁  
頗有漢之遺風降及江左古意寢微而清商繼作  
於是楚調吳聲西曲南弄雜然興焉逮於有唐李  
杜韓柳元白張王李賀孟郊之倫皆有冠古之才  
不沿齊梁不襲漢魏因事立題號稱樂府之變然  
考之開元天寶已來宮掖所傳梨園弟子所歌旗  
亭所唱邊將所進率當時名士所爲絕句爾故王  
之渙黃河遠上王昌齡昭陽日影之句至今豔稱  
之而右丞渭城朝雨流傳尤衆好事者至譜爲陽  
關三疊他如劉禹錫張祜諸篇尤難指數由是言

之唐三百年以絕句擅場即唐三百年之樂府也  
而子又奚疑宋洪文敏公邁常集唐絕句至萬首  
經進孝宗御覽褒賜優厚余少習是書惜其蹊駁  
久欲爲之槩定而未暇也歸田之五載爲康熙戊  
子乃克成之而以問荅之語次爲序序所不及者  
凡例具之云漁洋老人王士禎序



唐人萬首絕句選凡例

宋洪文敏萬首絕句雖經進孝宗御覽然其書頗多譌舛總雜約畧指之如何遜沈警梁陳間人侯夫人隋宮人槩行混入至唐人小說如東陽夜怪錄之類亦點簡冊幾於兒戲矣又有一詩而隸兩人複見重出蓋欲取盈萬首故無暇持擇刊正耳然如編錄之體何

五言初唐王勃獨爲擅場盛唐王裴輞川唱和工力悉敵劉涇溪有意抑裴謬論也李白氣體高妙崔國輔源本齊梁韋應物本出右丞加以古澹後



之爲五言者於此數家求之有餘師矣

七言初唐風調未諧開元天寶諸名家無美不備  
李白王昌齡尤爲擅場昔李滄溟推秦時明月漢  
時關一首壓卷余以爲未允必求壓卷則王維之  
渭城李白之白帝王昌齡之奉帚平明王之渙之  
黃河遠上其庶幾乎而終唐之世絕句亦無出四  
章之右者矣中唐之李益劉禹錫晚唐之杜牧李  
商隱四家亦不減盛唐作者云

王弇州云七言絕句少伯與太白爭勝毫釐俱是  
神品又云七言絕盛唐主氣氣完而意不甚工中

晚唐主意意工而氣不甚完然各有至者未可以  
時代優劣也此論甚確

集中仙詩鬼詩妙作頗多亦畧存之不必辨其真  
僞

七言如孫元晏胡曾之詠史曹唐之小游仙讀之  
輒作嘔噦一槩不錄錄元晏一首

唐絕句有最可笑者如人主人臣是親家如蜜蜂  
爲主各磨牙如若教過客都來嚙采盡商山枳殼  
花如兩人對坐無言語盡日唯聞落子聲如今朝  
有酒今朝醉明日愁來明日愁當日如何下筆後



世如何竟傳殆不可曉

才調集載王之渙惆悵詞容齋因之無論其詩氣格迥異而之渙開元時人乃預詠霍小玉崔鶯鶯事豈非千古笑柄按惆悵詞乃王渙所作渙字羣吉晚唐人詩載計敏夫紀事今正之

詩出小說家者不錄間有存者止冷朝陽戎昱舒元興數首耳

洪本字句或與今本異然對較之洪本不如今本者甚多今從其善者不必從宋本也

吳郡趙凡夫本區別四唐淆亂差少今以趙本與

紀事品彙參伍其次第洪元本雖云萬首而頗有遺漏趙補入者多今補詩槩未及收祇從元本

元汶陽周氏撰三體唐詩不專絕句明新都楊氏撰唐絕增奇非唐人之全元趙章泉澗泉選唐絕句其評注多迂腐穿鑿如韋蘇州滁州西澗一首獨憐幽草澗邊生上有黃鸝深樹鳴以爲君子在下小人在上之象以此論詩豈復有風雅耶余爲此選亦以補周氏楊氏之所未及而爲趙氏一洗膚陋之見云爾

余舊撰盛唐諸公詩曰三昧集又刪唐人英靈間



氣篋中御覽國秀極玄又玄搜玉才調九集益以  
宋姚氏唐文粹樂府古歌詩爲十集惟宋洪氏萬  
首唐人絕句每欲刪定以其浩汗輒爾中輟後二  
十年始成即此本是也唐選更有丹陽麗則二集  
訪求數十年不可得漢上題襟集聞楚潛江莫進  
士與先有藏本數千里往借鈔則詭云頃遊鄱陽  
失之矣迄今以爲憾事并記於此

唐人萬首絕句選

第一卷作者四十五人

計詩一百一十九首

第二卷作者五十五人

計詩一百零八首

第三卷作者三十一人

計詩一百三十首

第四卷作者二十六人

計詩一百三十九首

第五卷作者三十四人

計詩一百四十二首

第六卷作者十六人

計詩一百三十三首

第七卷作者五十七人

計詩一百二十四首

共計作者二百六十四人

共計詩八百九十五首



唐人萬首絕句選卷一

哈佛大學漢和  
圖書館珍藏印

鄱陽 洪邁 元本

濟南 王士禎 選本

五言一

王勃

寒夜思 三首

久別侵懷抱他鄉變容色月夜調鳴琴相思此何  
極

雲間征思斷月下歸愁切鴻鴈西南飛如何故人  
別



朝朝碧山下夜夜滄江曲復此遙相思清尊湛芳

涿

霜華淨天末霧色籠江際客子常畏人胡爲久留

滯

思歸

長江悲已滯萬里念將歸況復高風晚山山黃葉

飛

盧照鄰

曲江花

浮香繞曲岸圓影覆華池常恐秋風早飄零君不

知

駱賓王

易水

此地別燕丹壯士髮衝冠昔時人已沒今日水猶

寒

上官儀

洛堤曉行

脉脉廣川流驅馬歷長洲鵲飛山月曙蟬噪野風

秋



韋承慶

南行別弟

萬里人南去三春鴈北飛未知何歲月得與爾同歸

宋之問

塗中寒食

馬上逢寒食塗中屬暮春可憐江浦望不見洛橋人

送杜審言

卧病人事絕嗟君萬里行河橋不相送江樹遠含

情

張說

蜀道後期

客心爭日月來往預期程秋風不相待先到洛陽城

廣州作

去國歲方晏愁心轉不堪離人與江水終日向西南

郭元振

子夜春歌二首



青樓含日光綠池起風色贈子同心花殷勤此何極

知陌頭楊柳枝已被春風吹妾心正斷絕君懷那得

蘇頲

汾上驚秋

北風吹白雲萬里渡河汾心緒逢搖落秋聲不可聞

張九齡

自君之出矣

自君之出矣不復理殘機思君如滿月夜夜減清輝

王適

江上梅

忽見寒梅樹花開漢水濱不知春色早疑是弄珠人

東方虬

王昭君 二首

掩涕辭丹鳳銜悲向白龍單于浪驚喜無復舊時容



胡地無花草春來不似春自然衣帶緩非是爲腰身

盧僎

南樓望

去國三巴遠登樓萬里春傷心江上客不是故鄉人

途中

抱玉三朝楚懷書十上秦年年洛陽陌花鳥弄歸人

王維

荅裴迪

淼淼寒流廣蒼蒼秋雨晦君問終南山心知白雲外

鳥鳴澗

雲溪雜題

人閑桂花落夜靜春山空月出驚山鳥時鳴春澗中

萍池

春池深且廣會待輕舟回靡靡綠萍合垂楊掃復開

鷓鴣堰



乍向紅蓮沒復出青蒲颺獨立何離襪銜魚古查  
上

孟城坳 輞川集

新家孟城口古木餘衰柳來者復爲誰空悲昔人  
有

華子岡

飛鳥去不窮連山復秋色上下華子岡惆悵情何  
極

斤竹嶺

檀欒映空曲青翠濛濛漣漪暗入商山路樵人不可

知

鹿柴

空山不見人但聞人語響返景入深林復照青苔  
上

木蘭柴

秋山斂餘照飛鳥逐前侶彩翠時分明夕嵐無處  
所

南垞

輕舟南垞去北垞森難即隔浦望人家遙遙不相  
識



藥家瀨

颯颯秋雨中淺淺石溜瀉跳波自相濺白鷺驚復下

白石灘

清淺白石灘綠蒲向堪把家住水東西浣紗明月下

竹里館

獨坐幽篁裏彈琴復長嘯深林人不知明月來相照

辛夷塢

木末芙蓉花山中發紅萼磻戶寂無人紛紛開且落

漆園

古人非傲吏自闕經世務偶寄一微官婆娑數株樹

山中送別

山中相送罷日暮掩柴扉春草明年綠王孫歸不歸

左掖梨花

閑灑堦前草輕隨箔外風黃鶯弄不足銜入未央



宮

息夫人

莫以今時寵難忘舊日恩看花滿眼淚不共楚王  
言

相思子

紅豆生南國春來發幾枝勸君休采擷此物最相  
思

班婕妤

宮殿生秋草君王恩幸疎那堪聞鳳吹門外度金  
輿

雜詠二首

客自故鄉來應知故鄉事來日綺窗前寒梅著花  
未

已見寒梅發復聞啼鳥聲心心視春草畏向玉階  
生

裴迪

鹿柴

日夕見寒山便爲獨往客不知深林事但有麝麝  
跡

木蘭柴



蒼蒼落日時  
鳥聲亂溪水  
緣溪路轉深  
幽興何時已

茱萸泝

飄香亂椒桂  
布葉間檀欒  
雲日雖迴照  
森沈猶自寒

宮槐陌

門前宮槐陌  
是向欽湖道  
秋來山雨多  
落葉無人掃

南垞

孤舟信風泊  
南垞湖水岸  
落日下崦嵫  
清波殊淼

漫

金屑泉

潌潌憺不流  
金碧如可拾  
凌晨含素華  
獨往事朝汲

白石灘

跂石復臨水  
弄波情未極  
日下川上寒  
浮雲澹無色

送崔九

歸山深淺去  
須盡丘壑美  
莫學武陵人  
暫遊桃源裏



李白

玉階怨

玉階生白露夜久侵羅襪  
却下水精簾玲瓏望秋月

夜思

牀前明月光疑是地上霜  
舉頭望山月低頭思故鄉

銅官山

我愛銅官樂千年未擬還  
要須迴舞袖拂盡五松山

敬亭獨坐

衆鳥高飛盡孤雲去獨閑  
相看兩不厭只有敬亭山

青溪半夜聞笛

羌笛梅花引吳溪隴水清  
寒山秋浦月腸斷玉關情

秋浦歌

愁作秋浦客強看秋浦花  
山川如剡縣風日似長沙

送陸判官往琵琶峽



水國秋風夜殊非遠別時長安如夢裏何日是歸期

重憶賀監

欲向江東去將誰共舉杯稽山無賀老却棹酒船迴

杜甫

八陣圖

功蓋三分國名高八陣圖江流石不轉遺恨失吞吳

孟浩然

送朱大入秦

遊人五陵去寶劍直千金分手脫相贈平生一片心

祖詠

望終南殘雪

終南陰嶺秀積雪浮雲端林表明霽色城中增暮寒

崔國輔

銅雀臺

朝日照紅妝擬上銅雀臺畫眉猶未了魏帝使人



催

采蓮曲

玉澈花紅發金塘水碧流相逢畏相失並著采蓮  
舟

王孫遊

自與王孫別頻看黃鳥飛應緣春草誤著處不成  
歸

怨詞

妾有羅衣裳秦王在時作爲舞春風多秋來不堪  
著

少年行

遺却珊瑚鞭白馬驕不行章臺折楊柳春日路旁  
情

渭西別李崧

隴外長亭堠山深古塞秋不知嗚咽水何事向西  
流

崔顥

長干曲 三首

君家住何處妾住在橫塘停舟暫借問或恐是同  
鄉



家臨九江水來去九江側同是長干人生小不相識

下渚多風浪蓮舟漸覺稀那能不相待獨自逆潮歸

王昌齡

送張四

楓林已愁暮楚水復堪悲別後冷山月清猿無斷時

留別武陵田太守

按劒行千里微軀感一言曾爲大梁客不負信陵

恩

題僧房

棕櫚花滿院苔蘚入閑房彼此名言絕空中聞異香

朝來曲

人是鳴珂動花連繡戶春盤龍玉臺鏡唯待畫眉

高適

詠史

尚有綈袍贈應憐范叔寒不知天下士猶作布衣



看

岑參

見渭水思秦川

渭水東流去何時到雍州  
憑添兩行淚寄向故園流

九日思長安故園

強欲登高去無人送酒來  
遙憐故園菊應傍戰場開

王之渙

送別

楊柳東門樹青青夾御河  
近來攀折苦應爲別離多

登鸛雀樓

白日依山盡黃河入海流  
欲窮千里目更上一層樓

儲光羲

江南曲

日暮長江裏相邀歸渡頭  
落花如有意來去逐船流

洛陽道



大道直如髮春日佳氣多五陵貴公子雙雙鳴玉珂

賈至

有贈

舞怯銖衣重笑疑桃臉開方知漢成帝虛築避風臺

王縉

別輞川

山月曉仍在林風涼不絕殷勤如有情惆悵令人別

崔興宗

留別王維

駐馬欲分襟清寒御溝上前山景氣佳獨往還惆悵

丘爲

左掖梨花

冷豔全欺雪餘香乍入衣春風且莫定吹向玉階飛

張旭

清溪汎舟



旅人倚征棹薄暮起勞歌笑攬清溪月清輝不厭多

李華

奉寄彭城公

公子三千客人人願報恩應憐抱關者貧病老夷門

蕭穎士

九日別元魯山

綿連漁川迴杳眇鴉路深彭澤興不淺臨風動歸心

崔曙

雨中送客

別愁復兼雨別淚還如霰寄言海上雲千里長相見

于季子

項羽

北伐雖全趙東歸不王秦空歌拔山力羞作渡江人

薛奇童

吳聲子夜歌



淨掃黃金堦飛霜皎如雪下簾彈箜篌不忍見秋  
月

韋應物

寄盧陟

柳葉遍寒塘曉霜凝高閣累日此留連別來成寂  
寞

宿永陽寄璨師

遙知郡齋夜凍雪封松竹時有山僧來懸燈獨自  
宿

秋夜寄丘員外

懷君屬秋夜散步詠涼天山空松子落幽人應未  
眠

荅王卿送別

去馬嘶春草歸人立夕陽元知數日別要使兩情  
傷

懷瑯琊二釋子

白雲埋大壑陰厓滴夜泉應居西石室月照山蒼  
然

登樓

茲樓日登眺流歲暗蹉跎坐厭淮南守秋山紅樹



多

聞鴈

故園渺何處歸思方悠哉淮南秋雨夜高齋聞鴈來

劉長卿

春草宮懷古

君王不可見芳草舊宮春猶帶羅羣色青青向楚人

彈琴

冷七弦上靜聽松風寒古調雖自愛今人多不

送人往揚州

口發梅花山中動泉脉蕪城春草生君作揚州

送上人

孤雲將野鶴豈向人間住莫買沃洲山時人已知處

送靈澈

蒼蒼竹林寺杳杳鐘聲晚荷笠帶斜陽青山獨歸遠



平蕃曲

絕漠大軍還平沙獨戍閑空留一片石萬古在燕山

錢起

江行無題 五首

行背青山郭吟當白露秋風流無屈宋空詠古荊州

望響依莎草螢飛透水煙夜涼誰詠史空泊運租船

櫓慢開輕浪帆虛入暮雲客船雖自小容得庾將

軍

只尺愁風雨匡廬不可登祇疑雲霧裏猶有六朝

僧

口分江水東流獨有情當時好風物誰伴謝宣

城

劉方平

采蓮曲

落日清江裏荆歌豔楚腰采蓮從小慣十五即乘潮

京兆眉



新作蛾眉樣惟將月裏同有來凡幾日相效滿城中

春雪

飛雪帶春風徘徊亂繞空君看似花處偏在洛城東

張繼

感懷

調與時人背心將靜者論終年帝城裏不識五侯門

暢當

登鸛雀樓

迴臨飛鳥上高出世塵間天勢圍平野河流入斷山

顧況

憶舊遊

悠悠南國思夜向江南泊楚客斷腸時月明楓子落

丘丹

酬韋蘇州

久作煙霞侶暫將簪組親還同褚伯玉入館忝州



人

蓋嘉運

伊州歌

聞道黃花戍頻年未解兵可憐閨裏月偏照漢家營

唐人萬首絕句選卷一

唐人萬首絕句選卷二

鄱陽洪邁元本

濟南王士禎選本

五言二

李益

江南曲

嫁得瞿唐賈朝朝誤妾期早知潮有信嫁與弄潮兒

贈盧綸

世故中年別餘生此會同却將悲與病獨對朗陵



翁

鷓鴣詞

湘江斑竹枝錦翅鷓鴣飛處處湘雲合郎從何處歸

揚州懷古

故國歌鐘地長橋車馬塵彭城郭邊柳偏似不勝春

揚州早鴈

江上三千鴈年年過故宮可憐江上月偏照斷根蓬

金吾子

繡帳博山爐銀鞍馮子都黃昏莫攀折驚起欲棲烏

洛橋

金谷園中柳春來似舞腰那堪好風景獨上洛陽橋

李端

聽箏

鳴箏金粟柱素手玉房前欲得周郎顧時時誤拂弦



溪行遇雨寄柳中庸

日落衆山昏  
瀟瀟暮雨繁  
那堪兩處宿  
共聽一聲猿

一盧綸

塞下曲 四首

驚翎金僕姑  
燕尾繡螭弧  
獨立揚新令  
千營共一呼

林暗草驚風  
將軍夜引弓  
平明尋白羽  
沒在石稜中

月黑鴈飛高  
單于遠遁逃  
欲將輕騎逐  
大雪滿弓刀

刀

野幕敞瓊筵  
羌戎賀勞旋  
醉和金甲舞  
雷鼓動山川

川

皇甫冉

送王司直

西塞雲山遠  
東風道路長  
人心勝潮水  
相送過海陽

陽

婕妤怨 二首

花枝出建章  
鳳輦發昭陽  
借問承恩者  
雙蛾幾許長



長信多秋氣  
昭陽借月華  
那堪閉永巷  
聞道選良家

淮口寄趙員外

欲逐淮潮上  
暫停魚子溝  
相望知不見  
終是屢回頭

司空曙

金陵懷古

輦路江楓暗  
宮朝野草春  
傷心庾開府  
老作北朝臣

送盧秦卿

知有前期在  
難分此夜中  
無將故人酒  
不及石尤風

韓翃

漢宮曲

繡幙珊瑚鉤  
香閨翡翠樓  
深情不肯道  
嬌倚鈿塢篴

柳中庸

江行

繁陰乍隱洲  
落葉初飛浦  
蕭蕭楚客帆  
暮入寒江雨



戴叔倫

題三閭大夫廟

沅湘流不盡屈子怨何深日暮秋風起蕭蕭楓樹  
林

關山月

一鴈過連營繁霜覆古城胡笳在何處半夜起邊  
聲

嚴維

送人往金華

明月雙谿水清風八詠樓少年爲客處今日送君

遊

朱放

題竹林寺

歲月人間促煙霞此地多殷勤竹林寺更得幾回  
過

武元衡

春日作

縱橫桃李枝澹蕩春風吹美人歌白苧萬恨在蛾  
眉

權德輿



敷水驛

空見水名敷秦樓往事無臨風駐征騎聊復捋鬚

玉臺體

昨夜羣帶解今朝蟾子飛鉛華不可棄莫是藁砧歸

柳宗元

長沙驛

海鶴一爲別存亡三十秋今來數行淚獨上驛南樓

江雪

千山鳥飛絕萬徑人蹤滅孤舟蓑笠翁獨釣寒江雪

劉禹錫

罷和州遊建康

秋水清無力寒山暮多思官閑不計程徧上南朝寺

經檀道濟故壘

萬里長城壞荒營野草秋秣陵多士女猶唱白符鳩



視刀環

常恨言語淺不如人意深今朝兩相視脈脈萬重心

三閣詞

珠薄曲瓊鉤子細見揚州北兵那得渡浪語判悠悠

淮陰行二首

今日轉船頭金烏指西北煙波與春草千里同一色

隔浦望行船頭昂尾憶憶無奈挑菜時清淮春浪

軟

挑菜本作脫菜周益公詩話云山谷謂淮陰行情調殊麗惟脫菜時不可解予見古本作挑菜時東坡惠州詩水生挑菜渚恐用此語今從之

○詩話首句作隔浦望郎船與此小異

秋風引

何處秋風至蕭蕭送鴈羣朝來入庭樹孤客最先聞

紇那曲

楊柳鬱青青竹枝無限情周郎一回顧聽唱紇那聲

別蘇州



流水閨門外秋風吹柳條從來送客處今日自魂銷

孟郊

古別離

欲別牽郎衣郎今向何處不恨歸來遲莫向臨邛去

張籍

寄僧

松暗水涓涓夜涼人未眠西峰月猶在遙憶草堂前

涇州

行到涇州塞惟聞羌戍聲道旁雙古堠猶記向安西

令狐楚

遠別離

玳織黃金履金裝翡翠簪畏人相借問不擬到城南

思君恩

小苑鶯歌歇長門蝶舞多眼看春又去翠輦不曾過



從軍行 二首

暮雪連青海陰雲覆白山可憐班定遠生入玉門關

却望冰河闊前登雪嶺高征人幾多在又擬戰臨洮

王涯

閨人贈遠 二首

花明綺陌春柳拂御溝新爲報遼陽客流光不待人

形影一朝別煙波千里分君看望君處祇是起行

雲

張仲素

春閨思

裊裊城邊柳青青陌上桑提籠忘采葉昨夜夢漁

陽

春遊曲

行樂三春節林花百和香當年重意氣先占鬪雞場

白居易

庾樓新歲



歲時銷旅貌風景觸鄉愁牢落江湖意新年上庾樓

南浦別

南浦淒淒別西風嫋嫋秋一看腸一斷好去莫回頭

勤政樓西柳

半朽臨風樹多情立馬人開元一株柳長慶二年春

問劉十九

綠螳新醅酒紅泥小火爐晚來天欲雪能飲一杯

無

元稹

行宮

寥洛古行宮宮花寂寞紅白頭宮女在閑坐說玄宗

西還

悠悠洛陽夢鬱鬱灞陵樹落日正西歸逢君又東去

李賀

馬詩二首



赤兔無人用當須呂布騎吾聞果下馬羈策任蠻兒

風颺叔去匆匆如今不羨龍夜來霜壓棧駿骨折西

張祐

河滿子

故國三千里深宮二十年一聲河滿子雙淚落君前

玉樹後庭花

輕車何草草猶唱後庭花玉座誰爲主徒悲張麗

華

江南逢故人

河洛多塵事江山半舊遊春風故人夜又醉白蘋洲

徐凝

楊叛兒

哀怨楊叛兒駘蕩君知否香死博山爐烟生白門柳

張起

春情



畫閣餘寒在新年舊燕飛梅花猶帶雪未得試春衣

楊凌

賈客怨

山水路悠悠逢灘即滯留西江風未便何日到荊州

楊凝

柳絮

河畔多楊柳追遊盡狹斜春風一回送亂入暮愁家

唐彥謙

齊文惠宮人

認得前家令宮人淚滿裾不知梁佐命全是沈尚書

小院

小院無人夜烟斜月轉明清宵易怊悵不必有離情

賈島

劍客

十年磨一劍霜刃未曾試今日把似君誰有不平



事

陸暢

雪

怪得朔風急前庭如月輝  
天人寧許巧翦水作花飛

沈如筠

閨怨

鴈盡書難寄愁多夢不成  
願隨孤月影流照伏波營

潘佐

送人之宣城

江畔送行人千山生暮氛  
謝安團扇上爲畫敬亭雲

杜牧

題水西寺

三日去還住一生焉再遊  
含情碧溪水重上粲公樓

寄遠

隻影隨驚鴈單樓鎖畫籠  
向春羅袖薄誰念舞臺風



江樓

獨酌芳春酒登樓已半醺誰驚一行鴈衝斷過江雲

李商隱

漫成

霧夕詠芙蓉何郎得意初此時誰最賞沈范兩尚書

張惡子廟

下馬奠椒漿迎神白王堂如何鐵如意獨自與姚萇

追代盧家人嘲堂內

道却橫波字人前莫漫羞祇應同楚水長短入淮流

李夫人

一帶不結心兩股方安髻慚愧白茅人月沒教星替

滯雨

滯雨長安夜殘燈獨客愁故鄉雲水地歸夢不宜秋

餞席送人之梓州



莫歎萬重山君還我未還武關猶悵望何況百牢關

柳枝

集作無題本是律詩上二句亦不同

本是丁香樹春條結始生王作彈碁局中心最不平

散關遇雪

劍外從軍遠無人與寄衣散關三尺雪回夢舊鴛機

溫庭筠

三月雪

三月雪連夜未應傷物華只緣春欲盡山鶯伴梨花

碧澗驛曉思

孤燈伴殘夢楚國在天涯月落子規歇滿庭山杏花

許渾

早春憶江南

雲月有歸處故山清洛南如何一花發春夢徧江潭

塞下曲



夜戰桑乾北秦兵半不歸朝來有鄉信猶自寄寒衣

趙嘏

寒塘

曉髮梳臨水寒塘坐見秋鄉心正無限一鴈過南樓

施肩吾

湘竹詞

萬古湘江竹無窮奈怨何年年長春筍只是淚痕多

李頻

渡漢江

嶺外音書絕經冬復歷春近鄉情更怯不敢問來人

孟遲

懷鄭洎

夕風蘭舞幽香雨葉隨殘滴美人來不來前山看向

陸龜蒙

江行



酒旗蒜葉外樓影浪花中布帆張數幅唯待鯉魚  
風

夕陽

渡口和帆落城邊帶角收如何茂陵客江上倚危  
樓

皮日休

和陸魯望

刻石書離恨因成別後悲莫嫌春蠶薄猶有萬重  
絲

司空圖

樂府

寶馬跋塵光雙馳照路旁喧傳報戚里明日幸長

楊

韓偓

效崔國輔體

雨過碧苔院霜來紅葉樓閑堦上斜日鸚鵡伴人  
愁

從獵

蹀躞巴賓馬陪鯁碧野雞忽聞仙樂動賜酒玉偏  
提



儲嗣宗

早春

野樹花初發空山獨見時  
踟躕歷陽道鄉思滿南枝

鄭谷

望湖亭

湘水似伊水湘人非故人  
登臨獨無語風柳自搖春

李收

或作牧

幽情

幽人惜春暮潭上折芳草佳期何時還欲寄千里道

蔣吉

石城

繫纜石城下孤吟懷暫開  
江人撓艇子將謂莫愁來

西鄙人

哥舒歌

北斗七星高哥舒夜帶刀  
至今窺牧馬不敢過臨洮



荆叔

題慈恩寺塔

漢國山河在秦陵草木深暮雲千里色無處不傷心

釋靈澈

題天姥

天台衆峰外歲晚當寒空有時半不見崔嵬在雲中

遠公墓

古墓石稜稜寒雲晚照凝空悲虎溪月不見鴈門

僧

釋貫休

聞笛

霜月夜徘徊樓中羌笛催曉風吹不盡江上落殘梅

洞庭龍女

與許漢陽

海門連洞庭每去三千里十載一歸來辛苦瀟湘水

湘驛女子



題玉溪

紅樹醉秋色碧溪彈夜弦佳期不可再風雨杳如年


安邑坊女子

幽恨詩

卜得上峽日秋江風浪多江陵一夜雨腸斷木蘭歌

唐人萬首絕句選卷二







ChL 9117.1148

42

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE

41

OCT 11 1932





唐人萬首絕句選卷三

哈佛大學漢和  
圖書館珍藏印

鄱陽 洪邁一元本

濟南 王士禎選本

七言一

杜審言

贈蘇書記

知君書記本翩翩爲許從戎赴朝邊紅粉樓中應  
計日燕支山下莫經年

張說

送梁六



巴陵一望洞庭秋日見孤峰水上浮聞道神仙不可接心隨湖水共悠悠

張敬忠

邊詞

五原春色舊來遲二月垂楊未挂絲即今河畔冰開日正是長安花落時

王翰

春日思歸

楊柳青青杏發花年光誤客轉思家不知湖上菱歌女幾箇春舟在若耶

涼州詞

蒲桃美酒夜光杯欲飲琵琶馬上催醉臥沙場君莫笑古來征戰幾人回

李白

結襪子

燕南壯士吳門豪筑中置鉛魚隱刀感君恩重許君命太山一擲輕鴻毛

長門怨

桂殿長愁不記春黃金四壁起秋塵夜懸明鏡秋天上獨照長門宮裏人



越中懷古

越王勾踐破吳歸戰士還家盡錦衣宮女如花滿  
春殿祇今惟有鷓鴣飛

送孟浩然之廣陵

故人西辭黃鶴樓煙花三月下揚州孤帆遠影碧  
空盡惟見長江天際流

春夜雒陽聞笛

誰家玉笛暗飛聲散入東風滿洛城此  
八曲中聞折柳何人不起故園情

峨眉山月歌

峨眉山月半輪秋影入平羌江水瀟瀟夜發青溪向  
三峽思君不見下渝州

橫江詞 二首

海潮南去過溇陽牛渚由來險馬當橫江欲渡風  
波惡一水牽愁萬里長

橫江館前津吏迎向余東指海雲生郎今欲渡緣  
何事如此風波不可行

上皇西巡南京歌

莫道君王行路難六龍西幸萬人歡地轉錦江成  
渭水天迴玉壘作長安



黃鶴樓聞笛

一爲遷客去長沙西望長安不見家黃鶴樓中吹  
玉笛江城五月落梅花

下江陵

朝辭白帝彩雲間千里江陵一日還兩峽猿聲啼  
不住輕舟已過萬重山

望五老峰

廬山東南五老峰青天削出金芙蓉九江秀色可  
攬結吾將此地巢雲松

宣城見杜鵑花

蜀國曾聞子規鳥宣城還見杜鵑花一叫一回腸  
一斷三春三月憶三巴

舟下荆門

霜落荆門煙樹空布帆無恙挂秋風此行不爲鱸  
魚膾自愛名山人剡中

與賈舍人至汎洞庭

二首

洞庭西望楚江分水盡南天不見雲日落長沙秋  
色遠不知何處弔湘君

洞庭湖西秋月輝瀟湘江北早鴻飛醉客滿船歌  
白紵不知霜露入秋衣



巴陵贈賈舍人

賈生西望憶京華  
湘浦南遷莫怨嗟  
聖主恩深漢文帝  
憐君不遣到長沙

望天門山

天門中斷楚江開  
碧水東流向北迴  
兩岸青山相對出  
孤帆一片日邊來

長門怨

天迴北斗挂西樓  
金屋無人螢火流  
月光欲到長門殿  
別作深宮一段愁

陌上贈美人

白馬驕行踏落花  
垂鞭直拂五雲車  
美人一笑舉珠箔  
遙指紅樓是妾家

王昌齡

閨怨

閨中少婦不曾愁  
春日凝妝上翠樓  
忽見陌頭楊柳色  
悔教夫壻覓封侯

聽流人水調子

孤舟微月對楓林  
分付鳴箏與客心  
嶺色千重萬重雨  
斷腸收與淚痕深

梁苑



梁園秋竹古時煙城外風悲欲暮天萬乘旌旗何處在平臺賓客有誰憐

別李浦之京

故園今在灞陵西江畔逢君醉不迷小弟鄰莊尚漁獵一封書寄數行啼

甘泉歌

乘輿執玉已登壇細草霑衣春殿寒昨夜雲生拜初月萬年甘露水晶盤

芙蓉樓送辛漸

二首

寒雨連江夜入吳平明送客楚山孤洛陽親友如

相問一片冰心在玉壺

丹陽城南秋海陰丹陽城北楚雲深高樓送客不能醉寂寂寒江明月心

重別李評事

莫道秋江離別難舟船明日是長安吳姬緩舞留君醉隨意青楓白露寒

送狄宗亨

秋在水清山暮蟬洛陽樹色鳴皋煙送君歸去愁不盡又惜空度涼風天

送別魏二



醉別江樓橘柚香江風引雨入船涼憶君遙在湘  
山月愁聽清猿夢裏長

盧溪別人

武陵溪口駐扁舟溪水隨君向北流行到荆門上  
三峽莫將孤月對猿愁

長信秋詞 三首

金井梧桐秋葉黃珠簾不卷夜來霜熏籠玉枕無  
顏色臥聽南宮清漏長

奉帚平明金殿開且將團扇共徘徊玉顏不及寒  
鴉色猶帶昭陽日影來

真成薄命久尋思夢見君王覺後疑火照西宮知  
夜飲分明複道奉恩時

西宮春怨

西宮夜靜百花香欲卷珠簾春恨長斜抱雲和深  
見月朦朧樹色隱昭陽

西宮秋怨

芙蓉不及美人妝水殿風來珠翠香却恨含情掩  
秋扇空懸明月待君王

從軍行 五首

烽火城西百尺樓黃昏獨坐海風秋更吹羌笛關



山月無那金閨萬里愁  
琵琶起舞換新聲總是關山離別情  
撩亂邊愁聽不盡高高秋月照長城  
青海長雲暗雪山孤城遙望玉門關  
黃沙百戰穿金甲不破樓蘭終不還  
秦時明月漢時關萬里長征人未還  
但使龍城飛將在不教胡馬度陰山  
大漠風塵日色昏紅旗半卷出轅門  
前軍夜戰洮河北已報生禽吐谷渾

殿前曲

昨夜風開露井桃未央前殿月輪高  
平陽歌舞新承寵簾外春寒賜錦袍

青樓怨

香幃風動花入樓高調鳴箏緩夜愁  
腸斷關山不解說依依殘月下簾鉤

青樓曲 二首

白馬金鞍從武皇旌旗十萬宿長楊  
樓頭小婦鳴箏坐遙見飛塵入建章  
馳道楊花滿御溝紅妝漫綰上青樓  
金章紫綬千餘騎夫婿朝回初拜侯



河上歌

河上老人坐古槎和丹只用青蓮花至今八十如  
四十口道滄溟是我家

王維

送元二使安西

渭城朝雨裊輕塵客舍青青柳色新勸君更盡一  
杯酒西出陽關無故人

少年行

三首

新豐美酒斗十千咸陽遊俠多少年相逢意氣爲  
君飲繫馬高樓垂柳邊

一身能擘兩雕弧虜騎千重只似無側坐金鞍調  
白羽紛紛射殺五單于

漢家君臣歡宴終高議雲臺論戰功天子臨軒賜  
侯印將軍佩出明光宮

寄段十六

與君相見即相親聞道君家住孟津爲見行舟試  
借問客中時有洛陽人

九月九日憶山東兄弟

獨在異鄉爲異客每逢佳節倍思親遙知兄弟登  
高處徧插茱萸少一人



送韋評事

欲逐將軍取右賢沙場走馬向居延遙知漢使蕭關外愁見孤城落日邊

送沈子

楊柳渡頭行客稀罟師蕩槳向臨沂唯有相思似春色江南江北送君歸

寒食汜上作

廣武城邊逢暮春汶陽歸客淚沾巾落花寂寂啼山鳥楊柳青青渡水人

涼州詞

涼州城外少行人百尺峰頭望虜塵健兒擊鼓吹羌笛共賽城東越騎神

王之渙

涼州詞

黃河遠上白雲間一片孤城萬仞山羌笛何須怨楊柳春光不度玉門關

杜甫

江畔獨步尋花 三首

稠花亂蘂裏江濱行步歛危實怕春詩酒尚堪驅使在未須料理白頭人



黃師塔前江水東春光懶困倚微風桃花一簇開  
無主可愛深紅間淺紅

黃四孃家花滿溪千朵萬朵壓枝低流連戲蝶時  
時舞自在嬌鶯恰恰啼

戲作寄上漢中王

謝安舟楫風還起梁苑池臺雪欲飛杳杳東山攜  
漢妓泠泠修竹待王歸

和嚴鄭公軍城早秋

秋風嫋嫋動高旌玉帳分弓射虜營已收滴博雲  
間戍更奪蓬婆雪外城

解悶 四首

商胡離別下揚州憶上西陵故驛樓爲問淮南米  
貴賤老夫乘興欲東遊

一辭故國十經秋每見秋瓜憶故丘今日南湖采  
薇蕨何人爲覓鄭瓜州

不見高人王右丞輞川丘壑蔓寒藤最傳秀句寰  
區滿未絕風流相國能

復憶襄陽孟浩然清詩句句盡堪傳即今耆舊無  
新語漫釣槎頭縮項鱸

戲爲絕句



才力應難跨數公祇今誰是出羣雄或看翡翠蘭  
茗上未掣鯨魚碧海中

承聞河北諸將入朝口號

十二年來多戰場天威已息陣堂堂神靈漢代中  
興主功業汾陽異姓王

江南逢李龜年

岐王宅裏尋常見崔九堂前幾度聞正是江南好  
風景落花時節又逢君

孟浩然

送杜十四之江南

荆吳相接水爲鄉君去春江正淼茫日暮孤帆泊  
何處天涯一望斷人腸

常建

送宇文六

花映垂楊漢水清微風林裏一枝輕祇今江北還  
如此愁殺江南離別情

三日尋李九莊

雨歇楊林東渡頭永和三日蕩輕舟故人家在桃  
花岸直到門前溪水流

高適



除夜

旅館寒燈獨不眠客心何事轉悽然故鄉今夜思  
千里霜鬢明朝又一年

營州歌

營州少年厭原野狐裘蒙茸獵城下虜酒千鍾不  
醉人胡兒十歲能騎馬

塞上聞笛

雪淨胡天牧馬還月明羌笛戍樓閑借問梅花何  
處落風吹一夜滿關山

九曲詞

鐵騎橫行鐵嶺頭西看邏迤取封侯青海祇今將  
飲馬黃河不用更防秋

岑參

玉關寄長安主簿

東去長安萬里餘故人何惜一行書玉關西望腸  
堪斷況復明朝是歲除

送人

西原驛路挂城頭客散江亭雨未休君去試看汾  
水上白雲猶似漢時秋  
赴北庭度隴思家



西向輪臺萬里餘也知鄉信日應疎隴山鸚鵡能  
言語爲報家人數寄書

封大夫破播仙凱歌 二首

漢將承恩西破戎捷書先奏未央宮天子預開麟  
閣待祇今誰數貳師功

日落轅門鼓角鳴千羣面縛出蕃城洗兵魚海雲  
迎陣秣馬龍堆月照營

儲光羲

寄孫山人

新林二月孤舟還水滿清江花滿山借問故園隱

中興詩林

君子時時來往在人間

明妃曲

日暮驚沙亂雪飛傍人相勸易羅衣強來前帳看  
歌舞共待單于夜獵歸

賈至

巴陵夜別王八員外

柳絮飛時別洛陽梅花發後在三湘世情已逐浮  
雲散離恨空隨江水長

送李侍郎赴常州

雪晴雲散北風寒楚水吳山道路難今日送君須



盡醉明朝相憶路漫漫

春思

紅粉當壚弱柳垂金花  
臘酒解酴醾笙歌日暮能  
留客醉殺長安輕薄兒

巴陵與李十二裴九汎洞庭 二首

江上相逢皆舊遊  
湘山永望不堪愁  
明月秋風洞庭水  
孤鴻落葉一扁舟  
楓岸紛紛落葉多  
洞庭秋水晚來波  
乘興輕舟無近遠  
白雲明月弔湘娥

李願

遇劉五

洛陽一別梨花新  
黃鳥飛飛逢故人  
攜手當年共爲樂  
無驚蕙草惜殘春

寄韓朋

爲政心閑物自閑  
朝看飛鳥暮飛還  
寄書河上神明宰  
羨爾城頭姑射山

綦母潛

過上人蘭若

山頭禪室挂僧衣  
牕外無人溪鳥飛  
黃昏半在下山路  
却聽鐘聲連翠微



崔國輔

白紵詞

洛陽梨花落如霰  
河陽桃葉生復齊  
坐恐玉樓春欲盡  
紅綿粉絮裛妝啼

張旭

古本作張顛

桃花磯

隱隱飛橋隔野煙  
石磯西畔問漁船  
桃花盡日隨流水  
洞在青溪何處邊

山中留客

山光物態弄春暉  
莫爲輕陰便擬歸  
縱使晴明無

雨色入雲深處亦沾衣

嚴武

軍城早秋

昨夜秋風入漢關  
朔雲邊月滿西山  
更催飛將追驕虜  
莫遣沙場匹馬還

薛維翰

怨歌

百尺朱樓臨狹斜  
新妝能唱美人車  
皆言賤妾紅顏好  
要自狂夫不憶家

李華



春行寄興

宜陽城下草萋萋  
澗水東流復向西  
芳樹無人花自落  
春山一路鳥空啼

獨孤及

海上懷華中舊遊

涼風臺上三峰月  
不夜城邊萬里沙  
離別莫言關塞遠  
夢魂長在子真家

元結

款乃曲 二首

湘江二月春水平  
滿月和風宜夜行  
唱櫓欲過平

陽戍津吏相呼問姓名

千里楓林煙雨深  
無朝無暮有猿吟  
停橈靜聽曲中意  
好是雲山韶濩音

韋應物

登樓寄王卿

踏閣攀林恨不同  
楚雲滄海思無窮  
數家砧杵秋山下  
一郡荊榛寒雨中

寄諸弟

雨中禁火空齋冷  
江上流鶯獨坐聽  
把酒看花想諸弟  
杜陵寒食草青青



故人重九日求橘

憐君臥病思新橘試摘猶酸亦未黃書後欲題三百顆洞庭須待滿林霜

休日訪人不遇

九日驅馳一日閑尋君不遇又空還怪來詩思清人骨門對寒流雪滿山

登寶意上方

翠嶺香臺出半天萬家煙樹滿晴川諸僧近住不相識坐聽微鐘憶往年

滁州西澗

獨憐幽草澗邊生上有黃鸝深樹鳴春潮帶雨晚來急野渡無人舟自橫

荅東林道士

紫閣西邊第幾峰茅簷雨夜雪虎行蹤遙看黛色知何處欲出山門尋暮鐘

劉長卿

送劉萱之道州謁崔大夫

沅水悠悠湘水春臨岐一望一沾巾信陵門下三千客君到長沙見幾人

送李判官之潤州行營



萬里辭家事鼓輦金陵驛路楚雲西江春不肯留  
行客草色青青送馬蹄

寄別朱拾遺

天書遠召滄浪客幾度臨岐病未能江海茫茫春  
欲徧行人一騎發金陵

錢起

歸鴈

瀟湘何事等閑回水碧沙明兩岸苔二十五弦  
夜月不勝清怨却飛來

李嘉祐

王舍人竹樓

傲吏身閑笑五侯西江取竹起高樓南風不用蒲  
葵扇紗帽閑眠對水鷗

題虔上人壁

詩思禪心共竹閑任他流水向人間手持如意高  
牕裏斜日沿江千萬山

韓翃

送客之鄂州

江口千家帶楚雲江花亂點雪紛紛春風落日誰  
相見青翰舟中有鄂君



送齊山人

舊事仙人白兔公  
掉頭歸去又乘風  
柴門流水依然在  
一路寒山萬木中

寒食

春城無處不飛花  
寒食東風御柳斜  
日暮漢宮傳蠟燭  
輕煙散入五侯家

宿石邑山中

浮雲不共此山齊  
山靄蒼蒼望轉迷  
曉月暫飛千樹裏  
秋河隔在數峰西

江南曲

長樂花枝雨點消  
江城日暮好相邀  
朱樓不閉歲粧鎖  
淶水迴通宛轉橋

酬張子牛

蓬萊闕下事天家  
上路初回白鼻騮  
細管畫簫催平樂  
酒春衣夜宿杜陵花

贈李冀

王孫別舍擁朱輪  
不羨空名樂此身  
門外碧潭春洗馬  
樓前紅燭夜迎人

送人之潞州

官柳青青匹馬嘶  
回風暮雨入銅鞮  
佳期別在春



山裏應是人參五葉齊

少年行

千點斑斕噴玉驄青絲結尾繡纏髭鳴鞭曉出章  
臺路葉葉春衣楊柳風

皇甫冉

答張繼

悵望南徐登北固迢迢西塞阻東關落日臨川問  
音信寒潮惟帶夕陽還

送魏十六

秋夜沉沉此送君陰蟲切切不堪聞歸舟明日罷

陵道回首姑蘇是白雲

皇甫曾

巖嶺西望

漢家仙仗在咸陽洛水東流出建章野老至今猶  
望幸離宮秋樹獨蒼蒼



唐人萬首絕句選卷三

唐人萬首絕句選卷四

鄱陽 洪邁 元本

濟南 王士禎 選本

七言二

李益

夜上受降城聞笛

回樂峰前沙似雪受降城外月如霜不知何處吹

蘆管一夜征人盡望鄉

邊思

腰垂錦帶佩吳鉤走馬曾防玉塞秋莫笑關西將



家子祇將詩思入涼州

柳楊送客

青楓江畔白蘋洲  
楚客傷離不待秋  
君見隋朝更何事  
柳楊南渡水悠悠

從軍北征

天山雪後海風寒  
橫笛偏吹行路難  
磧裏征人三十萬  
一時回首月中看

行舟

柳花飛入正行舟  
臥引菱花信碧流  
聞道風光滿楊子  
天晴共上望鄉樓

隋宮燕

燕語如傷舊國春  
宮花欲落旋成塵  
自從一閉風光後  
幾度飛來不見人

送人歸岳陽

煙草連天楓樹齊  
岳陽歸路子規啼  
春江萬里巴陵戍  
落日看沉楚水西

臨滹沱見蕃使列名

漠南春色到滹沱  
邊柳青青塞馬多  
萬里江山今不閉  
漢家頻許郅支和

寫情



水紋珍簟思悠悠千里佳期一夕休從此無心愛  
良夜任他明月下西樓

聽曉角

邊霜昨夜墮關榆吹角當城片月孤無限塞鴻飛  
不度秋風吹入小單于

汴河曲

汴水東流無限春隋家宮闕已成塵行人莫上長  
堤望風起楊花愁殺人

暖川

胡風凍合鷓鴣泉牛馬千羣逐暖川塞外征行無

盡日年年移帳雪中天

宮怨

露溼晴花春殿香月明歌吹在昭陽似將海水添  
宮漏共滴長門一夜長

度破訥沙

破訥沙頭鴈正飛鷓鴣泉上戰初歸平明日出東  
南地滿磧寒光生鐵衣

盧綸

古豔詞

自拈裙帶結同心暖處偏知香氣深愛捉狂夫問



閑事不知歌舞用黃金

宮中樂 二首

臺殿雲涼秋色微  
君王初賜六宮衣  
樓船泛罷歸  
猶早行遣才人鬪射飛

雲日呈祥禮物殊  
彤庭生獻五單于  
塞垣萬里無  
飛鳥可是邊城用郅都

春日有懷

桃李風多日欲陰  
伯勞飛處落花深  
貧居靜久難  
逢信知隔春山不可尋

曲江春望 二首

菖蒲翻葉柳交枝  
暗上蓮舟鳥不知  
更到無花最  
深處玉樓金殿影參差  
泉聲徧野入芳洲  
擁沫吹花上碧流  
落日行人漸  
無路巢蜂乳燕滿高樓

司空曙

登峴亭

峴山回首望秦關  
南向荊州幾日還  
今日登臨唯  
有淚不知風景在何山

古寺花

共愛芳菲此樹中  
千跗萬藥裹枝紅  
遲遲欲去猶



回望覆地無人滿寺風

發渝州却寄韋判官

紅燭津亭夜見君  
繁弦急管兩紛紛  
平明分手空江上  
唯有猿聲滿水雲

送盧徹之太原

榆落鵬飛關塞秋  
黃雲畫角見并州  
翩翩羽騎雙旌後  
上客親隨郭細侯

峽口送友人

峽口花飛欲盡春  
天涯去住淚沾巾  
來時萬里同爲客  
今日翻成送故人

李端

送劉侍御

幾人同去謝宣城  
未及酬恩隔死生  
唯有夜猿知客恨  
嶧陽溪路第三聲

郎士元

柏林寺南望

谿上遙聞精舍鐘  
泊舟微徑度深松  
青山霽後雲猶在  
畫出西南四五峰

柳中庸

河陽橋送別



黃河流出有浮橋晉國歸人此路遙若傍闌千千  
里望北風驅馬雨瀟瀟

征人怨

歲歲金河復玉關朝朝馬策與刀環三春白雪歸  
青冢萬里黃河繞黑山

涼州曲

關山萬里遠征人一望關山淚滿巾青海戍頭空  
有月黃沙磧裏本無春

冷朝陽

送別紅線

采菱歌怨木蘭舟送客魂銷百尺樓還似洛妃乘  
霧去碧天無際水空流

張繼

楓橋夜泊

月落烏啼霜滿天江楓漁火對愁眠姑蘇城外寒  
山寺夜半鐘聲到客船

劉方平

送別

華亭霽色滿今朝雲裏檣竿去轉遙莫怪山前深  
復淺清淮一日兩回潮



月夜

更深月色半人家北斗闌干南斗斜今夜偏知春  
氣暖蟲聲新透綠牕紗

春怨

紗牕日落漸黃昏金屋無人見淚痕寂寞空庭春  
欲晚梨花滿地不開門

顧況

聽角思歸

故園黃葉滿青苔夢破城頭曉角哀此夜斷腸人  
不見起行殘月影徘徊

宮詞

玉樓天半起笙歌風送宮嬪笑語和月殿影開聞  
夜漏水精簾捲近秋河

聽歌

子夜新聲何處傳悲翁更憶太平年只今法曲無  
人唱已逐霓裳飛上天

宿昭應

武帝祈靈太一壇新豐樹色繞千官那知今夜長  
生殿獨閉空山月影寒

小孤山



古廟楓林江水邊寒鴉接飯鴈橫天大孤山遠小  
孤出月照洞庭歸客船

葉道士山房

水邊垂柳赤闌橋洞裏仙人碧玉簫近得麻姑書  
信否潯陽向上不通潮

竹枝

帝子蒼梧不復歸洞庭葉下荆雲飛巴人夜唱竹  
枝後腸斷曉猿聲漸稀

憶故園

惆悵多山人復稀杜鵑啼處淚沾衣故園此去千

餘里春夢猶能夜夜歸

戴叔倫

夜發袁江寄李潁川劉侍御

半夜回舟入楚鄉月明山水共蒼蒼孤猿更叫秋  
風裏不是愁人亦斷腸

湘南即事

廬橘花開楓葉衰出門何處望京師沅湘日夜東  
流去不爲愁人住少時

嚴維

丹陽送人



丹陽郭裏送行舟一別心知兩地秋日晚江南望  
江北寒鴉飛盡水悠悠

李涉

題開聖寺

宿雨初收草木濃羣鴉飛散下堂鐘長廊無事僧  
歸院盡日門前獨看松

過湖州妓宋態

曾識雲仙至小時芙蓉頭上綰青絲當時驚覺高  
唐夢唯有如今宋玉知

潤州聽暮角

江城吹角水茫茫曲引邊聲怨思長驚起暮天沙  
上鴈海門斜去兩三行

宿武關

遠別秦城萬里遊亂山高下入商州關門不鎖塞  
溪水一夜潺湲送客愁

竹枝詞二首

石壁千重樹萬重白雲斜掩碧芙蓉昭君溪上年  
年月偏照嬋娟色最濃  
十二峰頭月欲低空舫灘上子規啼孤舟一夜東  
歸客泣向春風憶建溪



哭田布

魏師臨陣却抽營誰管豺狼作信兵縱使將軍能  
伏劍何人島上哭田橫

京口送朱晝之淮南

兩行客淚愁中落萬樹山花雨後殘君到揚州見  
桃葉爲傳風水渡江難

邠州詞獻高尚書

二首

單于都護再分疆西引雙旌出帝鄉朝日詔書添  
戰馬即聞千騎取河湟

將家難立是威聲不見多傳衛霍名一自元和平

蜀後馬頭行處即長城

李約

過華清宮

君王遊樂萬幾輕一曲霓裳四海兵玉輦升天人  
已盡故宮猶有樹長生

權德輿

贈天竺靈隱二寺主

石路泉流兩寺分尋常鐘磬隔山聞山僧半在中  
峰住共占清猿與白雲

雜興

二首



琥珀尊開月映簾調弦理曲指纖纖含羞斂態勸  
君住更奏新聲刮骨鹽  
巫山雲雨洛川神珠襪香腰穩稱身惆悵妝成君  
不見含情起立問傍人

武元衡

春興

楊柳陰陰細雨晴殘花落盡見流鶯春風一夜吹  
鄉夢夢逐春風到洛城

送張司錄赴京

江南煙雨塞鴻飛西府文章謝掾歸相送汀洲蘭

杜晚菱歌一曲淚沾衣

題嘉陵驛

悠悠風旆繞山川山驛空濛雨似煙路半嘉陵頭  
已白蜀門西更上青天

聽歌

月上重樓絲管秋佳人夜唱古梁州滿堂誰是知  
音者不惜千金與莫愁

汴州聞角

何處金笳月裏悲悠悠邊客夢先知單于城上關  
山曲今日中原總解吹



韓愈

湘中酬張十一功曹

休垂絕徼千行淚，共泛清湘一葉舟。  
今日嶺猿兼越鳥，可憐同聽不知愁。

和李二十八司勳連昌宮

夾道疎槐出老根，高甍巨桷壓山原。  
宮前遺老來相問，今是開元幾葉孫。

晚次宣溪酬張使君

潮州南去接宣溪，雲水蒼茫日向西。  
客淚數行先自落，鷓鴣休傍耳邊啼。

同張水部籍遊曲江寄白二十二舍人

漠漠輕陰晚自開，青春白日映樓臺。  
曲江水滿花千樹，有底忙時不肯來。

次潼關先寄張十二閣老

荆山已去華山來，日照潼關四扇開。  
刺史莫辭迎候遠，相公新破蔡州迴。

桃林夜賀晉公

西來騎火照山紅，夜宿桃林臘月中。  
手把命珪兼相印，一時重疊賞元功。

柳宗元



柳州二月

宦情羈思共悽悽春半如秋意轉迷山城過雨百花盡榕葉滿庭鶯亂啼

酬夢得

日日臨池弄小雛還思寫論付官奴柳家新樣元和脚且盡薑芽斂手徒

聞徹上人亡寄楊侍郎

東越高僧舊姓湯幾時瓊佩觸鳴璫空花一散不知處誰采金英與侍郎

酬曹侍御

破額山前碧玉流騷人遙駐木蘭舟春風無限瀟湘意欲採蘋花不自由

劉禹錫

石頭城

山圍故國周遭在潮打空城寂寞回淮水東邊舊時月夜深還過女牆來

烏衣巷

朱雀橋邊野草花烏衣巷口夕陽斜舊時王謝堂前燕飛入尋常百姓家

江令宅



南朝詞臣北朝客歸來唯見秦淮碧池臺竹樹三  
畝餘至今人道江家宅

與歌者米嘉榮

唱得涼州意外聲舊人唯數米嘉榮近來時世輕  
先輩好添髭鬚事後生

聽舊宮人穆氏唱歌

曾隨織女渡天河記得雲間第一歌休唱貞元供  
奉曲當時朝士已無多

與歌者何戡

二十餘年別帝京重聞天樂不勝情舊人唯有何

戡在更與殷勤唱渭城

堤上行 二首

酒旗相望大堤頭堤下連檣堤上樓日暮行人爭  
渡急漿聲鴉軋滿中流

江南江北望煙波入夜行人相應歌桃葉傳情竹  
枝怨水流無限月明多

踏歌詞 二首

春江月出大堤平堤上女郎連袂行唱盡新詞歡  
不見紅霞映樹鷓鴣鳴

桃蹊柳陌好經過燈下妝成月下歌爲是襄王故



宮地至今猶自細腰多

竹枝詞 八首

白帝城頭春草生  
白鹽山下蜀江清  
南人上來歌一曲  
北人莫上動鄉情

山桃紅花滿上頭  
蜀江春水拍山流  
花紅易衰似郎意  
水流無限似儂愁

日出三竿春霧消  
江頭蜀客駐蘭橈  
憑寄狂夫書一紙  
住在成都萬里橋

城西門前滯滯堆  
年年波浪不能摧  
懊惱人心不如石  
少時東去復西來

瞿塘嘈嘈十二灘  
此中道路古來難  
長恨人心不如水  
等閑平地起波瀾

山上層層桃李花  
雲間煙火是人家  
銀釧金釵來負水  
長刀短笠去燒畬

楊柳青青江水平  
聞郎江上踏歌聲  
東邊日出西邊雨  
道是無晴還有晴

楚水巴山煙雨多  
巴人能唱本鄉歌  
今朝北客思歸去  
回入紇那披綠蘿

楊柳枝詞 三首

花萼樓前初種時  
美人樓上鬪腰肢  
如今拋擲長



街裏露葉如啼欲恨誰

煬帝行宮汴水濱數株殘柳不勝春晚來風起花  
如雪飛入宮牆不見人

城外春風吹酒旗行人揮袂日西時長安陌上無  
窮樹唯有垂楊管別離

浪淘沙詞

鸚鵡洲頭浪颭沙青樓春望日將斜銜泥燕子爭  
歸舍獨自狂夫不憶家

碧澗寺見元九和展上人詩

廊下題詩滿壁塵塔前松樹已鱗皴古來唯有王

文度重見平生竺道人

春詞

新妝宜面下朱樓深鎖春光一院愁行到中庭數  
花朵蜻蜓飛上玉搔頭

和令狐相公別牡丹

平章宅裏一闌花臨到開時不在家莫道兩京非  
遠別春明門外即天涯

白居易

同李十一醉憶元九

花時同醉破春愁醉折花枝作酒籌忽憶故人天



際去計程今日到梁州

竹枝

瞿塘峽口水煙低白帝城頭月向西唱到竹枝聲  
咽處斷猿晴鳥一時啼

宮詞

淚盡羅巾夢不成夜深前殿按歌聲紅顏未老恩  
先斷斜倚熏籠坐到明

暮江吟

一道殘陽鋪水中半江瑟瑟半江紅誰憐九月初  
三夜露似真珠月似弓

三月二十八日贈周判官

一春惆悵殘三日醉問周郎憶得無柳絮送人鶯  
勸酒去年今日到東都

伊州

老去將何散老愁新教小玉唱伊州亦應不得多  
年聽未教成時已白頭

華州西

每逢人靜慵多歇不計程行困即眠上得籃輦未  
能去春風敷水店門前

對酒



百歲無多時壯健一春能幾日  
清明相逢且莫推辭醉聽唱陽關第四聲

晚歸府

晚從履道來歸府街路雖長  
尹不嫌馬上涼於牀上坐綠槐風透紫蕉衫

魏王堤

花寒嬾發鳥慵啼信馬閑行到日西  
何處未春先有思柳條無力魏王堤

王子晉廟

子晉廟前山月明人聞往往夜吹笙  
鸞吟鳳唱聽

無拍多似霓裳散序聲

看采蓮

小桃閑上小蓮船半采紅蓮半白蓮  
不似江南惡風浪芙蓉池在臥牀前

香山寺

空門寂靜老夫閑伴鳥隨雲往復還家  
醞滿瓶書滿架半移生計入香山

木蘭花

膩如玉指塗朱粉光似金刀翦紫霞  
從此時時春夢裏應添一樹女郎花



楊柳枝

紅板江橋青酒旗  
館娃宮煖日斜時  
可憐雨歇東風定  
萬樹千條各自垂

酬裴令公贈馬相戲

安石風流無奈何  
欲將赤驥換青娥  
不辭便送東山去  
臨老何人與唱歌

水調

五言一徧最殷勤  
調少情多似有因  
不會當時翻曲意  
此聲腸斷爲何人

永豐坊園中垂柳

一樹春風千萬枝  
嫩於金色軟於絲  
永豐西角荒園裏  
盡日無人屬阿誰

元稹

西明寺牡丹

花向琉璃地上生  
光風炫轉紫雲英  
自從天女盤中見  
直至今朝眼更明

亞枝紅

平陽池上亞枝紅  
悵望山郵是事同  
還向萬竿深竹裏  
一枝渾臥碧流中

梁州夢



夢君同繞曲江頭也向慈恩院院遊  
亭吏呼人排去馬忽驚身在古梁州

嘉陵驛

嘉陵驛裏空牀客一夜嘉陵江水聲  
仍對牆南滿山樹野花撩亂月朧明

嘉陵江

秦人惟識秦中水長想吳江與蜀江  
今日嘉川驛樓下可憐如練繞明牕

好時節

身騎驄馬峨嵋下面帶霜威卓氏前  
虛度東川好

時節酒樓元被蜀兒眠

送孫勝

桐花暗淡柳惺惚池帶輕波柳帶風  
今日與君臨水別可憐春盡宋亭中

岳陽樓

岳陽樓上日銜牕影倒深潭赤玉幢  
悵望殘春萬般意滿櫺湖水入西江

寄庾敬休

小來同在曲江頭不省春時不共遊  
今日江風好暄暖可憐春盡古湘州



西歸

五年江上損容顏  
今日春風到武關  
兩紙京書臨水讀  
小桃花樹滿商山

重贈樂天

莫遣瓊瓏唱我詩  
我詩多是別君辭  
明朝又向江頭別  
月落潮平是去時

李德裕

長安秋夜

內官傳詔問戎機  
載筆金鑾夜始歸  
萬戶千門皆寂寂  
月中清露點朝衣

李紳

却望芙蓉湖

丹橘村邊煙火微  
碧波明處鴈初飛  
蕭條落日垂楊岸  
隔水寥寥聞搗衣

王播

題惠照寺

二首

三十年前此院游  
木蘭花發院新修  
如今再到經行處  
樹老無花僧白頭  
上堂已了各西東  
慙愧闍梨飯後鐘  
三十年來塵撲面  
如今始得碧紗籠



熊孺登

送準上人歸石經院

旃檀刻像今猶少白石鐫經古未曾歸去又尋翻  
譯寺前山應邇鴈門僧

湘江夜汎

江流如箭月如弓行盡三湘數夜中無那子規知  
向蜀一聲聲似怨春風

送僧

雲心自在山山去何處靈山不是歸日暮寒林投  
古寺雪花飛滿水田衣

戎昱

移家別湖上亭

好去春風湖上亭柳條藤蔓繫離情黃鶯久住渾  
相識欲別頻啼四五聲

塞下曲

漢將歸來虜塞空旌旗初下玉關東高蹄戰馬三  
千匹落日平原秋草中


途中寄李三

楊柳煙含灞岸春年年攀折爲行人好風若借低  
枝便莫遣青絲掃路塵



唐人萬首絕句選卷四







ChL 9117.1148

43

CHINESE-JAPANESE COLLECTION  
HARVARD COLLEGE LIBRARY  
FROM HARVARD-YENCHING INSTITUTE

OCT 11 1932

42





唐人萬首絕句選卷五

哈佛大學漢和  
圖書館珍藏印

鄱陽 洪一邁 元本

濟南 王士禎 選本

七言三

一李賀

南園 二首

長卿牢落悲空舍曼倩詼諧取自容見買若耶溪

水劒明朝歸去事猿公

尋章摘句老雕蟲曉月當簾挂玉弓不見年年遼

海上文章何處哭秋風



昌谷北園新筍

所取青光寫楚辭  
膩香春粉黑離離  
無情有恨何人見  
露壓煙啼千萬枝

酬荅

雍州二月海池春  
御水鵲鵲暖白蘋  
試問酒旗歌板地  
今朝誰是拘花人

呂溫

劉郎浦

吳蜀成婚此水濶  
明珠步障幄黃金  
誰將一女輕天下  
欲換劉郎鼎峙心

楊巨源

僧院聽琴

禪思何妨在玉琴  
眞僧不見聽時心  
離聲怨調秋堂夕  
雲向蒼梧湘水深

贈崔駙馬

百尺梧桐畫閣齊  
簫聲落處彩雲低  
平陽不惜黃金埒  
細雨花驄踏作泥

聽李憑彈箏篴

聽奏繁弦玉殿清  
風傳曲度禁林明  
君王聽樂梨園暖  
翻到雲門第幾聲



觀妓人入道

荀令歌鐘北里亭翠娥紅粉敵雲屏舞衣施盡餘  
香在今日花前學誦經

盧仝

逢鄭三遊山

相逢之處花茸茸石壁攢峰千萬重他日期君何  
處好寒流石上一株松

王涯

從軍詞

旄頭夜落捷書飛來奏金門著賜衣白馬將軍頻

破敵黃龍戍卒幾時歸

塞下曲

年少辭家從冠軍金鞍寶劍去邀勳不知馬骨傷  
寒水唯見龍城起暮雲

秋夜曲

桂魄初生秋露微輕羅已薄未更衣銀箏夜久殷  
勤弄心怯空房不忍歸

宮詞二首

一叢高鬢綠雲光宮樣輕輕淡淡黃爲看九天公  
主貴外邊爭學內家妝



炎炎夏日滿天時桐葉交加覆玉墀向晚移鐙上  
銀簾叢叢綠鬢坐彈碁

令狐楚

少年行

家本清河住五城須憑弓箭得功名等閑飛鞚秋  
原上獨向寒雲試射聲

舒元興

贈潭州李尚書

湘江舞罷忽成悲便脫蠻韉出絳帷誰是蔡邕琴  
酒客魏公懷舊嫁文姬

張仲素

塞下曲 四首

三戍漁陽再渡遼驛弓在臂劍橫腰匈奴似欲知  
名姓休傍陰山更射鵰

獵馬千行鴈幾雙燕然山下碧油幢傳聲漠北單  
于破火照旌旗夜受降

朔雪飄飄開鴈門平沙歷亂轉蓬根功名恥記擒  
生數直斬樓蘭報國恩

陰磧茫茫塞草肥橐韋峰上暮雲飛交河北望天  
連海蘇武曾將漢節歸



秋閨思 二首

碧牕斜日藹深暉愁聽寒螿淚溼衣夢裏分明見  
關塞不知何路向金微

秋天一夜靜無雲斷續鴻聲到曉聞欲寄征人問  
消息居延城外又移軍

漢苑行

春風淡蕩景悠悠鶯囀高枝燕入樓千步迴廊聞  
鳳吹珠簾處處上銀鉤

天馬詞

躑躅宛駒齒未齊縱金噴土向風嘶來時行盡金

河道獵獵輕風在碧蹄

張籍

送蜀客

蜀客南行祭碧雞木棉花發錦江西山橋日晚行  
人少時有猩猩樹上啼

蠻中

銅柱南邊毒草春行人幾日到金潏玉環穿耳誰  
家女自抱琵琶迎海神

蠻州

瘴水蠻中入洞流人家多住竹棚頭青山海上無



城郭唯見松牌記象州

哭孟寂

曲江院裏題名處十九人中最少年今日春光君  
不見杏花零落寺門前

法雄寺東樓

汾陽舊宅今爲寺猶有當時歌舞樓四十年來車  
馬散古槐深巷暮蟬愁

秋思

洛陽城裏見秋風欲作家書意萬重  
重復恐匆匆不盡行人臨發又開封

涼州詞二首

邊城暮雨鴈飛低蘆筍初生漸欲齊  
無數鈴聲遙過磧應馱白練到安西

鳳林關裏水東流白草黃榆六十秋  
邊將皆承主恩澤無人解道取涼州

宮詞二首

新鷹初放兔猶肥白日君王在內稀  
薄暮千門臨欲鎖紅妝飛騎向前歸

黃金捍撥紫檀槽絃索初張調更高  
盡理昨來新上曲內官簾外送櫻桃



寄李渤

五度溪頭躑躅紅  
嵩陽寺裏講時鐘  
春山處處行  
應好一月看花到幾峰

春別曲

長江春水綠堪染  
蓮葉出水大如錢  
江頭橘樹君  
自種那不长繫木蘭船

寒塘曲

寒塘沉沉柳葉疎  
水暗人語驚栖鳬  
舟中少年醉  
不起持燭照水射游魚

王建

江陵使至汝州

回看巴路在雲間  
寒食離家麥熟還  
日暮數峰青  
似染商人說是汝州山

華清宮

酒幔高樓一百家  
宮前楊柳寺前花  
內園分得溫  
湯水二月中旬已進瓜

十五夜望月

中庭地白樹栖鴉  
冷露無聲溼桂花  
今夜月明人  
盡望不知秋思在誰家

霓裳詞

四首



弟子部中留一色聽風聽水作霓裳散聲未足重  
來授直到牀前見上皇  
自直梨園得出稀更番上曲不教歸一時跪拜霓  
裳徹立地階前賜紫衣  
旋翻曲譜聲初足除在梨園未教人宣與書家分  
手寫中官走馬賜功臣  
傳呼法部按霓裳新得承恩別作行日晚貴妃樓  
上看內人昇下綺羅箱

宮詞 二十四首

羅衫葉葉繡重重金鳳銀鵝各一叢每偏舞時分

兩向太平萬歲字當中

魚藻池中鎖翠娥先皇行處不曾過如今池底休  
鋪錦菱角雞頭積漸多

內人相續報花開准擬君王便看來逢著五弦紅  
繡袋宜春院裏按歌回

太儀前日暖房來囑向昭陽乞藥栽敕賜一窠紅  
躑躅謝恩未了奏花開

御前新賜紫羅襦不下金階上軟輿宮局總來爲  
喜樂院中新拜內尚書

日冷天晴近臘時玉階金瓦雪離離浴堂門外抄



名入公主家人謝面脂

未承恩澤一家愁乍到宮中憶外頭求守管弦聲  
款逐側商調裏唱伊州

東風潑火雨新休昇盡春泥掃雪溝走馬犢車當  
御路漢陽公主進雞毬

金吾除夜進儺名畫袴朱衣四隊行院院燒燈如  
白日沉香火底坐吹笙

避暑昭陽不擲盧井邊含水噴鴉雛內中數日無  
呼喚搦得滕王蛺蝶圖

延英引對碧衣郎江硯宣毫各別牀天子下簾親

考試宮人手裏過茶湯

新調白馬怕鞭聲供奉騎來繞殿行先報諸王侵  
早入隔門催進打球名

對御難爭第一籌殿前不打背身球內人唱好龜  
茲急天子捎回過玉樓

城東北面望雲樓半下珠簾半上鉤騎馬行人長  
速過恐防天子在樓頭

射生宮女宿紅妝把得新弓各自張臨上馬時齊  
賜酒男兒跪拜謝君王

紅蠻捍撥貼眉前移坐當頭近御筵用力獨彈金



殿響鳳皇飛出四條弦

家常愛著舊衣裳空插紅梳不作妝忽地下階  
帶解非時應得見君王

琵琶先抹綠腰頭小管丁寧側調愁半夜美人雙  
起唱一聲聲出鳳凰樓

春池日暖少風波花裏牽船水上歌遙索劍南新  
樣錦東宮先釣得魚多

彈碁玉指兩參差背局臨虛鬪著危先打角頭紅  
子落上三金字半邊垂

叢叢洗手繞金盆旋拭紅巾入殿門衆裏遙拋金

橘子在前收得便承恩

宿妝殘粉未明天總立昭陽花樹邊寒食內人長  
白打庫家先散與金錢

蓬萊正殿壓雲鰲紅日初生碧海濤開著五門遙  
北望柘黃新筩御牀高

簾下浪切

移來女樂部頭邊新賜花檀木五絃纒得紅羅手  
帕子當中更畫一雙蟬

鮑防

上巳寄孟中丞

世間禊事風流處鏡裏雲山若畫屏今日會稽王



內史好將賓客醉蘭亭

寶年

奉誠園聞笛

曾絕朱纓吐錦茵欲披荒草訪遺塵  
秋風忽灑西園淚滿目山陽笛裏人

寶庠

陪留守內巡至上陽宮感興

愁雲漠漠草離離太液鉤陳處處疑  
薄暮毀垣春雨裏殘花猶發萬年枝

寶鞏

襄陽寒食寄宇文籍

煙水初銷見萬家東風吹柳萬條斜  
大堤欲上誰相伴馬踏春泥半是花

洛中即事

高梧葉盡鳥巢空洛水潺湲夕照中  
寂寂天橋車馬絕寒鴉飛入上陽宮

寄南游兄弟

書來未報幾時還知在三湘五嶺間  
獨立衡門秋水闊寒鴉飛去日沉山

宮人斜



離宮路遠北原斜  
生死深恩不到家  
雲雨今歸何處去  
黃鸝飛上野棠花

南游感興

傷心欲問前朝事  
惟見江流去不回  
日暮東風春草綠  
鷓鴣飛上越王臺

楊憑

雨中怨秋

辭家遠客愴秋風  
千里寒雲與斷蓬  
日暮隔山投古寺  
鐘聲何處雨濛濛

送客往荊州

巴丘過日暮登城  
雲水湘東一色平  
若愛春秋繁露學  
正逢元凱鎮南荆

楊凝

初次巴陵

西江浪接洞庭波  
積水遙連天上河  
鄉信爲憑誰寄去  
汀州燕鴈漸來多

送客入蜀

劒閣迢迢夢想間  
行人歸路繞梁山  
明朝騎馬搖鞭去  
秋雨槐花子午關

楊凌



早春雪中

新年雨雪少晴時  
屢失尋梅看柳期  
鄉信憶隨回鴈早  
江春寒帶故陰遲

明妃曲

漢國明妃去不還  
馬馱弦管向陰山  
匣中縱有菱花鏡  
羞向單于照舊顏

賈島

渡桑乾

客舍并州已十霜  
歸心日夜憶咸陽  
無端更渡桑乾水  
却望并州是故鄉

宿林家亭子

牀頭枕是溪中石  
井底泉通竹下池  
宿客未眠過夜半  
獨聞山雨到來時

贈人斑竹拄杖

揀得林中最細枝  
結根石上長身遲  
莫嫌滴瀝紅斑少  
恰是湘妃淚盡時

張祜

千秋樂

八月平時花萼樓  
萬方同樂是千秋  
傾城人看長竿出  
一技初成趙解愁



春鶯轉

興慶池南柳未開太真先把一枝梅內人已唱春鶯轉花下傚傚軟舞來

邠王小管

虢國潛行韓國隨宜春深院映花枝金輿遠幸無人見偷把邠王小管吹

孟才人

偶因歌態詠嬌嬈傳唱宮中十二春却爲一聲道滿子下泉須弔孟才人

折楊柳

凝碧池邊斂翠眉景陽樓下結青絲那勝妃子朝元閣玉手和煙弄一枝

華清宮 二首

天闕沉沉夜未央碧雲仙曲舞霓裳一聲玉笛向空盡月滿驪山宮漏長

紅樹蕭蕭閣半開上皇曾幸此宮來至今風俗驪山下村笛猶吹阿濫堆

集靈臺 二首

日光斜照集靈臺紅樹花迎曉露開昨夜上皇新授籙太真含笑入簾來



號國夫人承主恩平明騎馬入公門却嫌脂粉污  
顏色淡掃蛾眉朝至尊

阿鵲湯

月照宮城紅樹芳綠窗燈影在雕梁金輿未到長  
生殿妃子偷尋阿鵲湯

雨霖鈴

雨霖鈴夜却歸秦猶見張徽一曲新長說上皇和  
淚教月明南內更無人

宿湓浦逢崔昇

江流不動月西沉南北行人萬里心況是相逢鴈

天夕星河寥落水雲深

聽箏

十指纖纖玉筍紅鴈行輕過翠絃中分明似說長  
城苦水咽雲寒一夜風

楚州韋中丞筵篋

千重鉤鎖撼金鈴萬顆真珠瀉玉瓶恰值滿堂人  
欲醉甲光纔觸一時醒

金陵渡

金陵津渡小山樓一宿行人自欲愁潮落夜江斜  
月裏兩三星火是瓜洲



遊淮南

十里長街市井連月明橋上看神仙人生只合揚  
州死禪智山光好墓田

徐凝

漢宮曲

水色簾前流玉霜趙家飛燕侍昭陽掌中舞罷簫  
聲絕三十六宮秋夜長

憶揚州

蕭娘臉下難勝淚桃葉眉頭易得愁天下三分明  
月夜二分無賴是揚州

唐彥謙

穆天子傳

王母清歌玉琯悲瑤臺應有再來期穆王不得重  
相見恐爲無端哭盛姬

楚天

楚天遙望每長嘔宋玉襄王盡作塵不會瑤姬朝  
與暮更爲雲雨待何人

寄徐山人

一室清羸鶴體孤體和神瑩爽冰壺吳中高士雖  
求死不那稽山有謝敷



垂柳

絳惹春風別有情  
世間誰敢鬪輕盈  
楚王江畔無端種  
餓損纖腰學不成

鄧艾廟

昭烈遺黎死尚羞  
揮刀斫石恨譙周  
如何千載留遺廟  
血食巴山伴武侯

曲江春望

杏豔桃光奪晚霞  
樂遊無廟有年華  
漢朝冠蓋皆陵墓  
十里宜春下苑花

落花

紛紛從此見花殘  
轉覺長繩繫日難  
樓上有愁春不淺  
小桃風雪凭闌干

仲山

千載遺蹤寄薜蘿  
沛中鄉里漢山河  
長陵亦是閑丘隴  
異日誰知與仲多

洛神

人世仙家本自殊  
何須相見向中途  
驚鴻瞥過游龍去  
漫惱陳王一事無

長安秋望

柳短莎長溪水流  
雨微煙暝立溪頭  
寒鴉閃閃前



山去杜曲黃昏獨自愁

裴交泰

長門怨

自開長門經幾秋  
羅衣溼盡淚還流  
一種蛾眉明月夜  
南宮歌管北宮愁

羊士諤

望女几山

女几山頭春雪消  
路傍仙杏發柔條  
心期欲去知何日  
惆悵回車上野橋

登樓

槐柳蕭疎繞郡城  
夜添山雨作江聲  
秋風南陌無車馬  
獨上高樓故國情

憶江南舊遊

山陰道上桂花初  
王謝風流滿晉書  
會作江南部從事  
秋來還復憶鱸魚

郡中

紅衣落盡暗香殘  
葉上秋光白露寒  
越女含情已無限  
莫教長袖倚闌干

汎舟後溪

雨餘芳草淨沙塵  
水綠灘平一帶春  
唯有啼鶻似



留客桃花深處更無人

盧隱

雨霽登北原

稻黃撲撲黍油油野樹連山澗自流憶得年時馮  
翊部謝郎相引上樓頭

朱慶餘

宮中詞

寂寂花時閉院門美人相並立瓊軒含情欲說宮  
中事鸚鵡前頭不敢言

劉商

題黃陂夫人祠

蒼山雲雨逐明神唯有香名歲歲春東風三月黃  
陂水只見桃花不見人

題潘師房

渡水傍山尋絕壁白雲飛處洞門開仙人來往行  
無跡石徑春風長綠苔

錢珝

春恨

負罪將軍在北朝秦淮芳草綠迢迢高臺愛妾魂  
消盡憑仗丘遲爲一招



李羣玉

寄友

野水晴山雪後時  
獨行村路更相思  
無因一向溪頭醉  
處處寒梅映酒旗

漢陽太白樓

江上晴樓翠靄間  
滿簾春水滿窗山  
青楓綠草將愁去  
遠入吳雲暝不還

南莊春曉

草暖沙長望去舟  
微茫煙浪向巴丘  
沅湘寂寂春歸盡  
水綠蘋香人自愁

黃陵廟

黃陵廟前莎草春  
黃陵女兒茜裙新  
輕舟小櫓唱歌去  
水遠山長愁殺人

題王侍御宅

門向滄江碧嶂開  
地多鷗鷺少塵埃  
綠陰十里灘聲裏  
閑去王家看竹來

殷堯藩

贈歌人郭婉

石家金谷舊歌人  
起唱花筵淚滿巾  
紅粉少年諸弟子  
一時怊悵望梁塵



鮑溶

隋宮

柳塘煙起日西斜  
竹浦風迴鴈弄沙  
煬帝春游古城在  
壞宮芳草滿人家

贈楊鍊師

二首

紫煙衣上繡春雲  
清隱山書小篆文  
明月在天將鳳管  
夜深吹向玉晨君

道士夜誦藥珠經  
白鶴下繞香煙聽  
夜移經盡人上鶴  
天風吹入秋冥冥

漢宮詞

月映東窗似玉輪  
未央前殿絕聲塵  
宮槐花落西風起  
鸚鵡驚寒夜喚人

繁知一

題巫山廟

忠州刺史今才子  
行到巫山定有詩  
爲報高唐神女道  
早排雲雨候清辭

薛宜僚

別妓段東美

阿母桃花方似錦  
王孫芳草正如煙  
不須更向滄溟望  
惆悵歡情恰一年



嚴休復

聞玉蕊院真人降

拜車潛下玉龜山塵世何由覩薜蘿唯有無情枝  
上雪好風吹綴綠雲鬟

陳羽

吳中覽古

吳王舊國水煙空香徑無人蘭葉紅春色似憐歌  
舞地年年先發館娃宮

將歸舊山留別

相共遊梁今獨還異鄉搖落憶青山信陵死後

公子徒向夷門學抱關

湘君祠

二妃哭處湘江深二妃愁處雲沉沉商人酒滴廟  
前草蕭颯風生斑竹林

襄陽過孟子舊居

襄陽城郭春風裏漢水東流去不還孟子死來江  
樹老煙霞猶在鹿門山



唐人萬首絕句選卷五

唐人萬首絕句選卷六

鄱陽 洪邁元本

濟南 王士禎選本

七言四

杜牧

過勤政樓

千秋佳節名空在承露絲囊世已無唯有紫苔偏  
稱意年年因雨上金鋪

思舊遊二首

十載飄然繩檢外樽前自獻自爲酬秋山春雨閒



吟處倚徧江南寺寺樓

李白題詩水西寺古木回巖樓閣風半醒半醉遊  
三日紅白花開山雨中

過華清宮

長安回望繡成堆山頂千門次第開一騎紅塵妃  
子笑無人知是荔枝來

登樂遊原

長空澹澹孤鳥沒萬古銷沈向此中看取漢家何  
事業五陵無樹起秋風

沈下賢

斯人清唱何人和草徑苔蕪不可尋一夕小剪山  
下夢水如環珮月如襟

將赴吳興登樂遊原

清時有味是無能閒愛孤雲靜愛僧欲把一麾江  
海去樂遊原上望昭陵

江南春

千里鶯啼綠映紅水村山郭酒旗風南朝四百八  
十寺多少樓臺煙雨中

雲夢澤

日旗龍旆想飄揚一索功高縛楚王直是超然五



湖客未如終始郭汾陽

題城樓

鳴軋江樓角一聲微陽歛歛落寒汀不用憑欄苦  
回首故鄉七十五長亭

初冬夜飲

淮陽多病偶求歡客袖侵霜舉燭盤砌下梨花一  
堆雪明年誰此凭闌干

斑竹筒簟

血染斑斑成錦紋千年遺恨至今存分明知是湘  
妃淚何忍將身臥淚痕

醉後題僧院

觥船一櫂百分空十載青春不負公今日鬢絲禪  
榻畔茶煙輕颺落花風

赤壁

折戟沈沙鐵未消自將磨洗認前朝東風不與周  
郎便銅雀春深鎖二橋

泊秦淮

煙籠寒水月籠沙夜泊秦淮近酒家商女不知亡  
國恨隔江猶唱後庭花

秋浦途中



蕭蕭山路窮秋雨淅淅溪風兩岸蒲爲問寒沙新  
到鴈來時還下杜陵無

題桃花夫人廟

細腰宮裏露桃新脉脉無言度幾春至竟息亡緣  
底事可憐金谷墜樓人

寄揚州韓綽判官

青山隱隱水迢迢秋盡江南草未凋二十四橋明  
月夜玉人何處教吹簫

鄭瓘協律

廣文遺韻留襦散雞犬回書共一船自說江湖不

歸事阻風中酒過年年

江上

楚鄉寒食橘花時野渡臨風駐綵旗草色連雲人  
去住水紋如縠燕差池

宣州開元寺

松寺曾同一鶴棲夜深臺殿月高低何人爲倚東  
樓柱正是千山雪漲溪

南陵道中

南陵水面漫悠悠風緊雲寒欲變秋正是客心孤  
迥處誰家紅袖凭江樓



遣懷

落魄江湖載酒行  
楚腰纖細掌中情  
十年一覺揚州夢  
贏得青樓薄倖名

山行

遠上寒山石徑斜  
白雲生處有人家  
停車坐愛楓林晚  
霜葉紅於二月花

懷吳中馮秀才

長洲苑外草蕭蕭  
却計郵程歲月遙  
唯有別時今不忘  
暮煙秋雨過楓橋

七夕

銀燭秋光冷畫屏  
輕羅小扇撲流螢  
暗夜色涼如水坐  
看牽牛織女星

華清宮

零葉翻紅萬樹霜  
玉蓮開蕊暖泉香  
行雲不下朝元閣  
一曲淋鈴淚萬行

郡樓有宴病不赴

十二層樓敞畫簷  
連雲歌盡草纖纖  
空堂病怯階前月  
燕子嗔垂一桁簾

隋苑

紅霞一抹廣陵春  
定子當筵睡臉新  
却笑丘墟隋



煬帝破家亡國爲何人

邊上聞笳

何處吹笳薄暮天塞垣高鳥沒狼煙遊人一聽頭  
堪白蘇武爭禁十九年

金谷園

繁華事散逐香塵流水無情草自春日暮東風怨  
啼鳥落花猶似墜樓人

韓琮

楊柳枝詞

枝鬪纖腰葉鬪眉春來無處不如絲灞陵原上多

離別少有長條拂地垂

暮春瀝水送別

綠暗紅稀出鳳城暮雲宮闕古今情行人莫聽官  
前水流盡年光是此聲

施肩吾

山中得劉秀才京書

自笑家貧客到疎滿庭煙草不曾鋤今朝誰料三  
千里忽得劉公一紙書

戲贈李主簿

官罷江南客恨遙二年空被酒中消不知暗數春



遊處偏憶揚州第幾橋

雍陶

宿嘉陵館樓

離思茫茫正值秋每因風景卻生愁  
今宵難作刀州夢月色江聲共一樓

和孫明府懷舊山

五柳先生本在山偶然爲客落人間  
秋來見月多歸思自起開籠放白鵬

城西訪友人別墅

澧水橋西小徑斜日高猶未到君家  
村園門巷多

相似處處春風枳殼花

天津橋春望

津橋春水浸紅霞煙柳風絲拂岸斜  
翠輦不來金殿閉宮鶯銜出上陽花

李商隱

華山題王母祠

蓮華峯下鎖雕梁此去瑤池地共長  
好爲麻姑到東海勸栽黃竹莫栽桑

華清宮

華清恩幸古無倫猶恐蛾眉不勝人  
未免被他褒



女笑只教天子暫蒙塵

北齊 二首

一笑相傾國便亡何勞荆棘始堪傷  
小憐玉體橫陳夜已報周師入晉陽  
巧笑知堪敵萬幾傾城最在著戎衣  
晉陽已陷休回顧更請君王獵一圍

夜雨寄北

君問歸期未有期巴山夜雨漲秋池  
何當共剪西窗燭却話巴山夜雨時

贈歌妓

水精如意玉連環下蔡城危莫破顏  
紅綻櫻桃含白雪斷腸聲裏唱陽關

寄令狐郎中

嵩雲秦樹久離居雙鯉迢迢一紙書  
休問梁園舊賓客茂陵秋雨病相如

杜司勳

高樓風雨感斯文短翼差池不及羣  
刻意傷春復傷別人間唯有杜司勳

岳陽樓

漢水方城帶百蠻四鄰誰道亂周班  
如何一夢高



唐雨自此無心入武關

寄成都二從事

家近虹渠曲水濱全家羅襪起秋塵莫將越客千  
絲網網得西施別贈人

漢宮詞

青雀西飛竟未回君王長在集靈臺侍臣最有相  
如渴不賜金莖露一杯

柳

曾逐東風拂舞筵樂遊春苑斷腸天如何肯到清  
秋日已帶斜陽又帶蟬

爲有

爲有雲屏無限嬌鳳城寒盡怕春宵無端嫁得金  
龜婿辜負香衾事早朝

飲席代官妓贈兩從事

新人橋上著春衫舊主江邊側帽簷願得化爲紅  
綬帶許教雙鳳一時銜

代魏宮私贈

來時西館阻佳期去後漳河隔夢思知有宓妃無  
限意春松秋菊可同時

詠史



北湖南埭水漫漫一片降旗百尺竿三百年間同  
曉夢鍾山何處有龍盤

漢宮

通靈夜醮達清晨承露盤晞甲帳春王母西歸方  
朔去更須重見李夫人

江東

驚魚潑刺燕翩翩獨自江東上釣船今日春光太  
漂蕩謝家輕絮沈郎錢

代應

本來銀漢是紅牆隔得盧家白玉堂誰與王昌報

消息盡知三十六鴛鴦

過鄭廣文舊居

宋玉平生恨有餘遠循三楚弔三閭可憐留著臨  
江宅異代應教庾信居

涉洛川

通谷陽林不見人我來遺恨古時春宓妃漫結無  
窮恨不爲君王殺灌均

宮妓

珠箔輕明拂玉墀披香新殿鬪腰支不須看盡魚  
龍戲終遣君王怒偃師



宮詞

君恩如水向東流得寵憂移失寵愁莫向尊前奏  
花落涼風只在殿西頭

代贈 二首

樓上黃昏欲望休玉梯橫絕月中鉤芭蕉不展丁  
香結同向春風各自愁

東南日出照高樓樓上離人唱石州總把春山掃  
眉黛不知供得幾多愁

瑤池

瑤池阿母綺牕開黃竹歌聲動地哀八駿日行三

萬里穆王何事不重來

板橋曉別

回望高城落曉河長亭聽戶壓微波水仙欲上鯉  
魚去一夜芙蓉紅淚多

夕陽樓

花明柳暗繞天愁上盡重城更上樓欲問孤鴻向  
何處不知身世自悠悠

西南行却寄相送者

百里陰雲覆雪泥行人只在雪雲西明朝驚破還  
鄉夢定是陳倉碧野雞



齊宮詞

永壽兵來夜不扃金蓮無復印中庭梁臺歌管三  
更罷猶自風搖九子鈴

讀任彥昇碑

任昉當年有美名可憐才調最縱橫梁臺初建應  
惆悵不得蕭公作騎兵

有感

非關宋玉有微辭却是襄王夢覺遲一自高唐賦  
成後楚天雲雨盡堪疑

過楚宮

巫峽迢迢舊楚宮至今雲雨暗丹楓微生盡戀人  
間樂只有襄王憶夢中

龍池

龍池賜酒敞雲屏羯鼓聲高衆樂停夜半宴歸宮  
漏永薛王沉醉壽王醒

嫦娥

雲母屏風燭影深長河漸落曉星沉嫦娥應悔偷  
靈藥碧海青天夜夜心

憶住一師

無事經年別遠公帝城鐘曉憶西峯爐煙銷盡寒



燈晦童子開門雪滿松

寄蜀客

君到臨邛問酒壚近來還有長卿無金徽却是無  
情物不許文君憶故夫

賈生

宣室求賢訪逐臣賈生才調更無倫可憐夜半虛  
前席不問蒼生問鬼神

溫庭筠

贈少年

江海相逢

多秋風葉下洞庭波酒酣夜別淮

陰市月照高樓一曲歌

贈彈箏人

天寶年中事玉皇曾將新曲教寧王鈿蟬金鳳皆  
零落一曲伊州淚萬行

瑤瑟怨

冰簟銀牀夢不成碧天如水夜雲輕鴈聲遠過瀟  
湘去十二樓中月自明

春日雨

細雨濛濛入絳紗湖亭寒食孟珠家南朝漫自稱  
流品宮體何曾爲杏花



過吳景帝陵

王氣銷來水淼茫  
豈能才與命相妨  
虛開直瀆三千  
里青蓋何曾到洛陽

贈鄭徵君

一拋蘭櫂逐燕鴻  
曾向江湖識謝公  
每到朱門還悵望  
故山多在畫屏中

車駕西遊因而有作

宣曲長楊瑞氣凝  
上林狐兔待秋鷹  
誰將詞賦陪雕輦  
寂寞相如臥茂陵

題端正樹

路傍佳樹碧雲愁  
曾侍金輿幸驛樓  
草木榮枯似人事  
綠陰寂寞漢陵秋

經故翰林袁學士居

劍逐驚波玉委塵  
謝安門下更何人  
西州城外花千樹  
盡是羊曇醉後春

河中紫極宮

昔年曾伴玉真遊  
每到仙宮即是秋  
曼倩不歸花落盡  
滿叢煙露月當樓

夜看牡丹

高低深淺一闌紅  
把火殷勤照露叢  
希逸近來成



懶病不能容易向春風

題分水嶺

溪水無情似有情入山三日得同行  
嶺頭便是分頭處惜別潺湲一夜聲

鄂杜郊居

謹籬芳援近樵家壠麥青青一徑斜  
寂寞遊人寒食後夜來風雨送梨花

咸陽值雨

咸陽橋上雨如懸萬點空濛隔釣船  
還似洞庭春水色曉雲將入岳陽天

南歌子詞

井底點燈深燭伊共郎長行莫圍碁  
玲瓏骰子安紅豆入骨相思知不知

段成式

觀碁

閒對文楸傾一壺黃羊枰上幾成都  
他時謁帝銅池曉便賭宣城太守無

寄溫飛卿牋紙

三十六鱗充使時數番猶得裏相思  
待將袍襖重鈔了盡寫襄陽播諾詞



嘲飛卿

醉袂幾侵魚子纈飄纓長眉鳳凰釵知君欲作閒  
情賦應願將身作錦鞵

柳煙梅雪隱青樓殘日黃鸝語未休見說自能裁  
袖腹不知誰更著梢頭

柔卿解籍戲呈飛卿

長擔犢車初入門金牙新醞盈深罇良人爲漬木  
瓜粉遮却紅腮交午痕

出意挑鬟一尺長金爲鈿鳥簇釵梁鬱金種得花  
茸細添入春衫領裏香

戲高侍御

三首

七尺髮猶三角梳玳牛獨駕長檐車曾城自有三  
青鳥不要蓮東雙鯉魚

別起青樓作幾層斜陽慢卷鹿盧繩厭裁魚子深  
紅纈泥覓蜻蜓淺碧綾

可羨羅敷自有夫愁中漫捋白髭鬚豹錢驄子能  
擎舉兼著連乾許換無

許渾

寄桐江隱者

潮去潮來洲渚春山花如繡草如茵嚴陵臺下桐



江水解釣鱸魚有幾人

謝亭送別

勞歌一曲解行舟紅葉青山水急流日暮酒醒人已遠滿天風雨下西樓

下第懷友人

獨掩衡門花落時一封書信緩歸期南宗更有瀟湘客夜夜月明聞竹枝

題段太尉廟

靜想追兵緩翠華古碑荒廟閉松花紀生不向榮陽死爭有山河屬漢家

經秦皇墓

龍盤虎踞樹層層勢入浮雲亦是崩一種青山秋草裏行人惟拜漢文陵

過湘妃廟

古木蒼山掩翠娥月明南浦起微波九疑望斷幾千載斑竹淚痕今更多

送宋處士歸山

賣藥修琴歸去遲山風吹盡桂花枝世間甲子須臾事逢著仙人莫看棋

秦樓曲



秦女夢餘仙路遙月牕風簾夜迢迢潘郎翠鳳雙  
飛去三十六宮聞玉簫

楚宮怨

十二峯晴花盡開楚宮雙闕對陽臺細腰爭舞君  
王醉白日秦兵天上來

聽唱山鷓鴣

金谷歌傳第一流鷓鴣清怨碧煙愁夜來省得曾  
聞處萬里月明湘水秋

學仙

心期仙訣意無窮采畫雲車起壽宮聞有三山木

知處茂陵松柏滿西風

紫藤

綠蔓穠陰紫袖低客來留坐小堂西醉中掩瑟無  
人會家近江南罨畫溪

趙嘏

烏栖曲

宮烏栖處玉樓深微月生簷夜夜心香輦不回花  
自落春來空佩辟寒金

宛陵望月寄沈學士

一川如畫敬亭東待詔閒遊處處同天竺山前鏡



湖畔何如今日庾樓中

翡翠巖

芙蓉幕裏千場醉翡翠巖前半日閒惆悵晉朝人  
不到謝公拋力上東山

經汾陽舊宅

門前不改舊山河破虜曾經馬伏波今日獨經歌  
舞地古槐疎冷夕陽多

寄盧中丞

葉覆清溪濫濫紅路橫秋色馬嘶風獨攜一榼郡  
齋酒吟對青山憶謝公

尋僧

溪戶無人谷鳥飛石橋橫木挂禪衣看雲日暮倚  
松立野水亂鳴僧未歸

西江晚泊

茫茫藹藹失西東柳浦桑村處處同戍鼓一聲帆  
影盡水禽飛起夕陽中

江樓感舊

獨上江樓思渺然月光如水水如天同來望月人  
何處風景依稀似去年

送從翁中丞奉使黠戛斯



旌旗杳杳鴈蕭蕭春盡窮沙雪未消料得堅昆受  
宣後始知公主已歸朝

寄遠

禁鐘聲盡見棲禽關塞迢迢故國心無限春愁莫  
相問落花流水洞房深

聽琴

抱琴花夜不勝春獨奏相思淚滿巾第五指中心  
最恨數聲嗚咽為何人

盧弼

邊庭四時怨

朔風吹雪透刀瘢飲馬長城窟更寒夜半火來知  
有敵一時齊保賀蘭山

皇甫松

浪淘沙詞

蠻歌苴蔻北人愁松雨蒲風野艇秋浪起鴉鵲眠  
不得寒沙細細入江流

劉阜

長門怨

蟬鬢慵梳倚帳門蛾眉不掃慣承恩傍人未必知  
心事一面殘妝空淚痕



馬戴

送友人遊邊

有客新從絕塞回自言曾上李陵臺尊前話盡北  
風起秋色蕭條胡鴈來

薛能

折楊柳

洛橋晴影覆江船羌笛秋聲溼塞煙閒想習池公  
宴罷水蒲風絮夕陽天

吳姬

身是三千第一名內家叢裏獨分明芙蓉殿上中

元日水拍銀盆弄化生

鄭畋

初秋寓直

曉星猶挂結璘樓三殿風高藥樹秋玉笛數聲飄  
不住閒人依約在東頭

馬嵬坡

玄宗回馬楊妃死雲雨難忘日月新終是聖明天  
子事景陽宮井又何人

崔珏

席上贈琴客



七條弦上五音寒此藝知音自古難唯有開元房  
太尉始終憐得董庭蘭

唐人萬首絕句選卷六

唐人萬首絕句選卷七

鄱陽 洪邁 元本

濟南 王士禎 選本

七言五

陸龜蒙

石竹花

曾看南朝畫國娃古羅衣上碎明霞而今莫共金  
錢鬪買却春風是此花

送慕容

滿目山川似勢碁況當秋鴈正斜飛金門若召羊



玄保賭取江東太守歸

鄴宮詞

花飛蝶駭不愁人水殿雲廊別置春曉日靚裝千  
騎女白櫻桃下紫綸巾

懷宛陵舊游

陵陽佳地昔年游謝朓青山李白樓唯有日斜溪  
上思酒旗風影落春流

白蓮

素蘂多蒙別豔欺此花真合在瑤池無情有恨何  
人見月曉風清欲隨時

後池

曉烟清露暗相和浴鴈浮鷗意緒多却是陳王詞  
賦錯枉將心事託微波

初冬偶作

桐下空階疊綠錢貂裘初綻擁高眠小爐低幌還  
遮掩酒滴灰香似去年

簾

枕映疎容晚向歆秋烟脈脈雨微微逆風鄣燕尋  
常事不學人前當妓衣

秘色越器



九秋風露越窰開奪得千峰翠色來好向中宵盛  
沉瀼共嵇中散鬪遺杯

木蘭花

或作李商隱

洞庭波浪渺無津日日征颿送遠人幾度木蘭舟  
上望不知元是此花身

皮日休

重臺荷花

欹紅嬌媚力難任每葉頭邊半米金可得教他水  
妃見兩重原是一重心

松江早春

松陵清淨雪消初見底新安恐未如穩凭船舷無  
一事分明數得鱸殘魚

病酒

鬱林步障晝遮明一炷濃香養病醒何事晚來還  
欲飲隔牆聞賣蛤蜊聲

玩金鷄鵲

鏤羽雕毛迴出羣溫磨飄出麝臍熏夜來曾吐紅  
茵畔猶自溪邊睡不聞

李訥

聽盛小叢歌贈崔侍御



華音總合選卷十  
三  
繡衣奔命去情多南國佳人斂翠蛾曾向教坊聽  
國樂爲君重唱盛叢歌

高湘

奉和

謝安春渚餞袁宏千里仁風一扇清歌黛慘時方  
酩酊不知公子重飛觥

盧澥

奉和

烏臺上客紫髯公共捧天書靜鏡中桃葉不須歌  
白苧耶谿暮雨起樵風

鄭谷

淮上與友人別

揚子江頭楊柳春楊花愁殺渡江人數聲風笛離  
亭晚君向瀟湘我向秦

席上贈歌者

花月樓臺近九衢清歌一曲倒金壺坐中亦有江  
南客莫向春風唱鷓鴣

吳融

閬鄉卜居

六載抽毫侍禁闈不堪多病決然歸五陵年少如



相問阿對泉頭一布衣

楚事

悲秋應亦抵傷春  
屈宋當年並楚臣  
何事從來好時節  
只將惆悵付詞人

高蟾

金陵晚望

曾伴浮雲歸晚翠  
猶陪落日泚秋聲  
世間無限丹青手  
一片傷心畫不成

馬逢

從軍

漢馬千蹄合一羣  
單于鼓角隔山聞  
沙埕風起紅樓下  
飛上胡天作陣雲

宮詞

玉樓天半起笙歌  
風送宮人笑語和  
月殿影闌聞曉漏水  
精簾捲近秋河

孟遲

過驪山

冷日微烟渭上愁  
華清宮樹不勝秋  
霓裳一曲千門鎖  
白盡梨園弟子頭

崔櫓



華清宮 二首

草遮回磴絕鳴鑾雲樹深深碧殿寒明月自來還  
自去更無人倚玉闌干

門橫金鎖悄無人落日秋聲渭水濱紅葉下山寒  
寂寂濕雲如夢雨如塵

王貞白

折楊柳

枝枝交影鑠長門嫩色曾沾雨露恩鳳輦不來春  
欲盡空留鶯語到黃昏

劉言史

泊花石浦

舊業叢臺廢苑東幾年爲梗復爲蓬杜鵑啼斷還  
家夢半在邯鄲驛樹中

宋邕

春日

輕花細葉滿林端昨夜春風曉色寒黃鳥不堪愁  
裏聽綠楊宜向雨中看

李郢

送李判官

津市停橈送別難熒熒蠟炬照更闌東風萬疊吹



江月誰伴袁褒宿夜灘

宿杭州虛白堂

秋月斜明虛白堂寒蛩唧唧樹蒼蒼江風徹曉不  
得睡二十五聲秋點長

裴夷直

贈美人琴絃

應從玉指到金徽萬態千情料可知今夜燈前湘  
水怨殷勤封在七條絲

儲嗣宗

小樓

松杉風外亂山青曲几焚香對石屏空憶去年春  
雨後燕泥時污太玄經

月夜

鴈池衰草露沾衣河水東流萬事微寂寞青陵臺  
上月秋風滿樹鵲南飛

羅鄴

放鷓鴣

好倚青山與碧谿刺桐毛竹待雙棲花時遷客傷  
離別莫向相思樹上啼

秋怨



夢斷南牕啼曉鳥新霜昨夜下庭梧不知簾外如  
規月還照邊城到曉無

羅虬

比紅兒詩 十二首

陷却平陽爲小憐周師百萬戰長川更教乞與紅  
兒貌舉國山河不直錢  
一曲都緣張麗華六宮齊唱後庭花若教比並紅  
兒貌枉破當時國與家  
樂營門外柳如陰中有佳人畫閣深若使五陵公  
子見買時應不惜千金

詔下人間選好花月眉雲髻盡名家紅兒若向當  
時見繫臂先封第一紗

拔得芙蓉出水新魏家公子信才人若教瞥見紅  
兒貌不肯留情賦洛神

樹杲西風日半沈地無人跡轉傷心阿嬌得似紅  
兒貌不費長門買賦金

薄羅輕翦越溪紋鷗翅低從兩鬢分料得相如偷  
見面不應琴裏挑文君

鸚鵡娥如裛露紅鏡前眉樣自深宮稍教得似紅  
兒貌不嫁南朝沈侍中



青史書來未是真可知  
纖智却在秦再三爲謝  
齊王后要解連環別與人

蘇小輕勻一面妝  
便留名字著錢塘  
藏鴟門外諸年少  
不識紅兒未是狂

天碧輕紗只六銖  
宛風含露透肌膚  
便教漢曲爭明媚  
應沒心情更弄珠

金粟妝成扼臂環  
舞腰輕轉瑞雲間  
紅兒生在開元末  
羞殺新豐謝阿蠻

羅隱

煬帝陵

入郭登橋出郭船  
紅樓日日柳年年  
君王忍把平陳業  
只換雷塘數畝田

司空圖

有感

國事皆須救未然  
漢家高閣漫凌烟  
功臣盡遣詞人贊  
不省滄洲畫魯連

華下

故國春歸未有涯  
小闌高檻別人家  
五更惆悵回孤枕  
猶有殘燈照落花

狂題



別鶴淒涼指法存  
戴逵能恥近王門  
世間第一風流事  
借得王公玉枕痕

韓偓

聞雨

香侵蔽膝夜寒輕  
聞雨傷春夢不成  
羅帳四垂紅燭背  
玉釵敲著枕函聲

已涼

碧闌干外繡簾垂  
猩色屏風畫折枝  
八尺龍鬚方錦褥  
已涼天氣未寒時

遙見

悲歌淚濕淡燕脂  
閑立風吹金縷衣  
白玉堂東遙見後  
令人評泊畫楊妃

寒食夜

側側輕寒翦翦風  
杏花飄雪小桃紅  
夜深斜搭秋千索  
樓閣朦朧細雨中

新上頭

學梳蟬鬢試新裙  
消息佳期在此春  
爲愛好多心轉惑  
徧將宜稱問傷人

閨怨

時光潛去暗淒涼  
嬾對菱花暈曉妝  
初折鞦韆人



寂寞後園青草任他長

浚院

鵝兒唼噤梳黃嘴鳳子輕盈膩粉腰深院下簾人  
晝寢紅薔薇映碧芭蕉

寄鄰莊道侶

聞說經旬不啟關藥牕誰伴醉開顏夜來雪壓村  
前竹剩見溪南幾尺山

劉駕

長門怨

御泉長繞鳳皇樓只是恩波別處流閑揲舞衣歸

未得夜來砧杵六宮秋

崔塗

湘中謠

烟愁雨細雲冥冥杜蘭香老三湘清故山望斷不  
知處鷓鴣隔花時一聲

讀漢武內傳

分明三鳥下儲胥一覺鈞天夢不如無那白頭方  
士到茂陵紅樹已蕭疎

夷陵夜泊

家依楚塞窮秋別身逐孤舟萬里行一曲巴歌半



江月便應消得二毛生

一司馬札

宮怨

柳色參差掩畫樓  
曉鶯啼送滿宮愁  
年年花落無人見  
空逐春泉出御溝

後朝先

越溪怨

越王宮裏如花人  
越水溪頭采白蘋  
白蘋未盡人先盡  
誰見江南春復春

陳陶

閑居雜興

越里娃童錦作襦  
豔歌聲壓郢中姝  
無人說向張京兆  
一曲江南十斛珠

隴西行

誓掃匈奴不顧身  
五千貂錦喪胡塵  
可憐無定河邊骨  
猶是春閨夢裏人

王偃

夜夜曲

北斗星移銀漢低  
班姬愁思鳳城西  
青槐陌上人  
行絕明月樓前烏夜啼



崔道融

羯鼓

華清宮裏打撩聲供奉絲簧束手聽寂寞鑾輿斜  
谷裏是誰翻得雨淋鈴

梅

溪上寒梅初滿枝夜來霜月透芳菲清光寂寞思  
無盡應待琴尊與解圍

酒醒

酒醒撥別殘灰火多少淒涼在此中爐畔自斟還  
自醉竹牕深夜雪兼風

韋莊

鄜州寒食

三首

滿街楊柳綠絲烟畫出清明二月天好是隔簾花  
樹動女郎撩亂送鞦韆

開元坡下日初斜拜婦歸來走鈿車可惜數枝紅  
豔好不知今夜落誰家

雨絲烟柳欲清明金屋人閑暖鳳笙永晝迢迢無  
一事隔街聞築氣毬聲

江行西望

西望長安白日遙半年無事駐蘭橈欲將張翰松



江雨畫作屏風寄鮑昭

古離別 二首

晴烟漠漠柳毵毵不那離情酒半酣更把玉鞭雲  
外指斷腸春色在江南  
一生風月供惆悵到處烟花恨別離至竟多情何  
處好少年長抱長年悲

金陵圖 二首

誰爲傷心畫不成畫人心逐世人情君看六幅南  
朝事老木寒雲滿故城

江雨霏霏江草齊六朝如夢鳥空啼無情最是臺

城柳依舊烟籠十里隄

孫光憲

竹枝

門前春水白蘋花岸上無人小艇斜商女經過江  
欲暮散拋殘食飼神鴉

楊柳枝

閨門風暖落花乾飛徧江城雪不寒獨有晚來臨  
水驛閑人多凭赤闌干

王渙

惆悵詞 七首



李夫人病已經秋漢武有來不舉頭所得穠華消  
歇盡楚魂湘血一生休

隋師戰艦欲亡陳國破應難保此身訣別徐郎淚  
如雨鑑鸞分後屬何人

嗚咽離聲管吹秋妾身今日爲君休齊奴不說平  
生事忍看花枝謝玉樓

七夕瓊筵往事陳兼花連帶共傷神蜀王殿裏三  
更月不見驪山私語人

陳宮興廢事難期三閣空餘綠草基狎客淪亡麗  
華死他年江令獨來時

少卿降北子卿還朔野離觴慘別新却到茂陵惟

一慟節毛零落鬢毛斑

夢裏分明入漢宮覺來燈背錦屏空紫臺月落關  
山曉腸斷君恩信畫工

杜荀鶴

新鴈

暮天新鴈起汀洲紅蓼花疎水國秋想得故園今  
夜月幾人相憶在江樓

張泌

惜花



蝶散鶯啼尚數枝日斜風定更離披看多記得傷  
心事金谷樓前委地時

寄人 二首

別夢依依到謝家小廊回合曲闌斜多情只有春  
庭月猶爲離人照落花

酷憐風月爲多情還到春時別恨生倚柱尋思倍  
惆悵一場春夢不分明

李九齡

山中寄友人

亂雲堆裏結茅廬已共紅塵跡漸疎莫問野人生

計事牕前流水枕前書

蔣吉

旅泊

霜月初高鸚鵡洲美人清唱發紅樓鄉心暗逐秋  
江水直到吳山脚下流

孫元晏

庾信

苦心詞賦向誰談淪落咸陽志豈甘可惜多才庾  
開府一生惆悵憶江南

馬彥



贈韓定辭

燧林芳草綿綿思盡日相攜陟麗譙別後囑嵇山  
上望羨君時復見王喬

囑嵇讀如權施  
詳顏氏家訓

韓定辭

酬馬或

崇霞臺上神仙客學辨癡龍藝最多盛德好將銀  
筆述麗詞堪與雪兒歌

開元名公

裴給事宅白牡丹

長安豪貴惜春殘爭賞新開紫牡丹別有玉盤承

露冷無人起就月中看

韋氏子

悼亡妓

惆悵金泥簇蝶裙春來猶見伴行雲不教布施剛  
留得恰似相逢李少君

君山父老

閑吟

湘中老人讀黃老手援紫藟坐碧草春至不知湘  
水深日暮忘却巴陵道

釋皎然



青陽上人院

君說南朝全盛日秣陵才子最多人  
千年秋色古池館誰見齊王西邸春

釋清塞

憶潯陽舊居兼贈長孫郎中

潯陽却到知何日此地今無舊使君  
長憶窮冬宿廬岳瀑泉冰折共僧聞

釋無本

行次漢上

習家池沼草萋萋嵐樹光中信馬蹄  
漢主廟前襄

水碧一聲風角夕陽低

梅妃

謝賜珍珠

桂葉雙眉久不描殘妝和淚污紅綃  
長門盡日無梳洗何必真珠慰寂寥

杜秋娘所歆

金縷曲

勸君莫惜金縷衣勸君須惜少年時  
有花堪折直須折莫待無花空折枝

魚玄機



送盧員外

玉壘山前風雪夜錦官城北別離魂  
信陵公子如相問長向夷門感舊恩

薛濤

送友人

水國蒹葭夜有霜月寒山色共蒼蒼  
誰言千里自今夕離夢杳如關塞長

竹郎廟

竹郎廟前多古木夕陽沈沈山更綠  
何處江村有笛聲聲聲盡是迎郎曲

武昌妓

續韋蟾句

悲莫悲兮生別離登山臨水送將歸  
武昌無限新栽柳不見楊花撲面飛

湘妃廟女子

無題

二首

碧杜紅蘅縹緲香冰絲彈月弄新涼  
峰巒一一渾相似九處堪疑九斷腸  
少將風月怨平湖見盡扶桑水到枯  
相約杏花壇上去畫闌紅子鬪擣蒲



桐廬神

與徐兵曹酬獻

忽然湖上片雲飛，不覺舟中雨濕衣。  
折得荷花渾忘却，空將荷葉蓋頭歸。

甘棠叟

無題

春草萋萋春水綠，野棠開盡飄香玉。  
繡嶺宮前鶴髮人，猶唱開元太平曲。

襄州舉人

無題

流水涓涓芹芽織，烏西飛客還家荒村無人作。  
寒食殯宮空對棠梨花。

天竺牧童

別李源

身前身後事茫茫，欲話因緣恐斷腸。  
吳越山川尋已徧，却回烟棹上瞿唐。

屏上美人

春陽曲

長安少女踏春陽，何處春陽不斷腸。  
舞袖弓彎渾忘却，羅帷空度九秋霜。



樂府辭蓋嘉運進

涼州歌

朔風吹葉鴈門秋萬里烟塵昏戍樓征馬長嘶青海北胡笳夜聽隴山頭

突厥三臺

鴈門山上鴈初飛馬邑欄中馬正肥昨日山西逢驛使殷勤南北送征衣

蘆中集

讀庾信集

四朝十帝盡風流建業長安兩醉游唯有一篇楊

柳曲江南江北爲君愁

初過漢江

襄陽好向峴亭看人物蕭條值歲闌爲報習家多置酒夜來風雪過江寒

無名氏

雜詩

近寒食雨草萋萋著麥苗風柳映堤等是有家歸未得杜鵑休向耳邊啼

浙江輕浪古悠悠望海樓吹望海愁莫恠鄉心隨魄斷十年爲客在他州



無定河邊暮笛聲  
赫連臺畔旅人情  
函關歸路千餘里  
一夕秋風白髮生

花落長川草色青  
暮山重疊雨冥冥  
逢春便覺飄蓬苦  
今日分飛一涕零

濟東觀察使

吳郡年家子

宋廣業較刊



